

Tuman ka paborable sang sitwasyon para labi nga isulong ang demokratikong rebolusyon sang banwa

Komite Sentral
Partido Komunista ng Pilipinas

Lubos nga kalipay naton nga saulogon ang ika-57 nga anibersaryo sang dungganon nga Partido Komunista sang Pilipinas! Sa makasaysayan nga okasyon nga ini, ginapadangat sang Komite Sentral ang mainit sini nga pagtamyaw sa tanan nga kadre kag katapo sang Partido, sa mga katapuan sang mga kaaylyado nga rebolusyonaryong organisasyon sang National Democratic Front, sa mga abyan, sa mga kaupod nga komunista, pwersang rebolusyonaryo kag kontra-imperyalista sa lain-lain nga bahin sang kalibutan, kag sa bug-os nga pumuluyong Pilipino.

Sa adlaw nga ini dumdumon kag kilalahon naton ang tanan nga baganihan kag martir sang rebolusyon Pilipino. Magtindog kita agud taas-i-

numol nga saludohan ang handura-
wan ni Kaupod Jose Maria Sison,
tsirman nga nagtukod sang Komite
Sentral sang Partido, nga nagaserbe

nga ubay kag kasanag sa Partido kag pila ka henerasyon sang mga komunista kag rebolusyonaryong aktibista. Saludohan man naton ang handura-
wan sang tanan nga baganihan kag martir sang pumuluyong Pilipino, la-
kip ang mga palangga naton nga mga lider nga nagserbe sa Komite Sentral, mga Pulang hangaway sang Bagong Hukbong Bayan, kag tanan nga mga kadre kag katapo nga bug-os kasing-
kasing nga ginhalad ang ila bug-os nga kabuhi para sa kahlwayan sang



tanang nga ginapigos.

Saludohan naton sanday Kaupod Luis Jalandoni, anay pinuno nga internasyunal nga tiglawas sang NDFP kag pinuno sang NDFP panel sa hambalanon pangkalinong, nga nagtaliwan sadtong Hunyo sa The Netherlands; kag si Kaupod Maria Malaya (Myrna Sularte), nga ginpatay sang kaaway sa isa ka inaway sa kabukiran sang Butuan City sadtong Pebrero. Ginapadangat man naton ang pagsaludo kay Kaupod Basavaraju, anay heneral nga sekretaryo sang Komite Sentral sang Communist Party of India (Maoist) kag si Kaupod Madvi Hidma, kumander sang People's Liberation Guerrilla Army sa India, kag sa tanan nga iban pa nga rebolusyonaryo sa lain-lain nga bahin sang kalibutan nga naghalad sang ila kabuhi para sa internasyunal nga proletaryado. Kuhaan naton sang inspirasyon ang ila maduagon nga kabuhi.

Tamyawon man naton sa adlaw nga ini ang tanan nga bag-ong katapo sang Partido, ilabi na ang mga pamatan-on nga kadre halin sa kubay sang masang anakbalhas, mga intelektwal kag iban pa nga saray sang katilingban. Kamo ang buasdamlag sang Partido kag sang rebolusyon Pilipino. Magtuon kamo sang maayo, magkuha sang ubay, patalumon ang panghuna-huna kag mangin mapainuboson sa pag-atubang sa mga hangkat sa pagpamuno sa lain-lain nga patag sang rebolusyonaryong hilikuton sang Partido. Kabulig ninyo sa pag-abaga sang mga mabug-at nga katungdanan ang mga may edad na kag may eksperyensya nga mga kadre kag katapo

sang Partido nga handa nga magpanugyan kag magpaambit sang ila eksperyensya.

Ipasundayag naton sa adlaw nga ini ang Marxismo-Leninismo-Maoismo, ang malig-on nga teoritikal nga pundasyon kon diin nagatindog ang Partido. Ini ang unibersal nga teorya para sa paghilway sang sahing mamumugon kag tanan nga pigos nga sahi. Palig-unon naton ang mga sandigan nga prinsipyo sang Partido kag ang programa sini para sa demokratikong rebolusyon sang banwa paagi sa pangmalawigon nga inaway banwa, agud tapuson ang mapiguson nga sistemang mala-kolonyal kag mala-pyudal, pukanon ang tatlo ka sandigan nga problema nga imperyalismo, pyudalismo kag burukrata-kapitalismo, kag agumon ang demokrasya kag pungsodnon nga kahilwayan agud bugnaon ang kondisyon para sa sosyalistang palaabuton.

Nagasulod kita subong sa ikatatlo ka tuig sang aton kahublagan panadlong, nga mayor isa ka Marxista-Leninista-Maoista nga kahublagan pagtuon. Sa espirito sang kahublagan panadlong, nagabaliktuon kita sa aton inagihan kag kritikal-sa-kaugalingon nga ginatumod ang aton mga kahuyangan kag mga nangin kasaypanan. Ginakalipay sang Komite Sentral nga i-report nga padayon nga nagabunga ang aton kahublagan panadlong kag nakaagum sang mga siginipikante nga mga pagsulong sa ideolohiya, pulitika kag organisasyon. Nagalaum kita nga sa padayon nga pagpanikasog sang tanan nga kadre kag katapuan sang partido, sa pagpamuno sang Komite Sentral, malab-ot naton ang mas mga dalagko nga kadalagan sa maabot nga mga tinuig.

Sa iwag sang Marxismo-Leninismo-Maoismo, matalum naton nga analisahon ang nagapanguna nga kontradiksyon nga nagabug-os sa subong nga ginaatubang nga sitwasyon sa pungsod kag bug-os nga kalibutan. Hakson naton ang permanente nga krisis sang mala-kolonyal kag mala-pyudal nga sistema sa Pilipinas, kag ang nagadugay na nga istagnasyon sang pangkalibutanon

nga sistemang kapitalista. Nagabukas ini sang madamo kag mga dalagko nga oportunidad agud isulong ang kawsa sang sahing mamumugon kag tanan nga pigos kag ginahimuslan nga sahi para sa kahilwayan.

Sa pagsugod sang subong nga tuig ginasigahum naton ang paglupok sang krisis sang nagahari nga sistema sa idalum sang rehimen US-Marcos. Apang nalapawan ini sang kadasig sang pagkaluto kag paglupok sang sitwasyon sugod sang tunga-tunga sang tuig. Patimaan ini, indi lang sang kadalumon sang krisis pang-ekonomiya kag sosyal, kundi labaw sa tanan, sang nagalumapaw nga kaakig sang pumuluyong Pilipino sa pagpamigos kag pagpaantus sa ila sang mga mahimuslanon kag manugkawkaw nga nagahari nga sahi.

Segurado nga magapadayon pa sa palaabuton ang wala sang kasolbaran nga krisis sa atubang sang wala sang latid nga korapsyon, pagsabwag sang pasistang terorismo kag tuman nga pagpakapapet sang rehimen Marcos. Ang rehimen US-Marcos subong ang pinaka-konsentrado nga dagway sang pagpamigos kag pagpaantus sa pumuluyong Pilipino. Sa tuig nga maabot, segurado nga magadako kag magalapad pa ang kahublagan protesta nga nagragasa sang nagligad nga mga bulan agud pasabton kag palayason sa poder sanday Marcos kag Duterte nga amo ang nagatiglawas subong sa pinaka-reaksyonaryo nga hubon sang mga nagahari nga sahi. Kadungan sini, segurado nga magalupok man ang lapnagon nga mga pakig-away sa kaumhan sa atubang sang patarasak nga pagpang-agaw sang duta kag pagpangkawkaw sa manggad sang pungsod.

Matuod nga tuman ka paborable sang sitwasyon subong sa Pilipinas agud pamunuan sang Partido ang labi nga pagsulong sang demokratikong rebolusyon sang banwa paagi sa pangmalawigon nga inaway banwa. Sakmiton naton ang higayon agud labi nga palaparon kag pabaskugon ang Partido kag ang bug-os nga rebolusyonaryong kahublagan, kag tamwaon ang mga dalagko nga pagsulong sa palaabuton.



ANG Bayan

Espesyal na Isyu | Disyembre 26, 2025

 ang.bayan@cpp.ph

Ang Ang Bayan ginabantala duha ka beses kada bulan sang Komite Sentral sang Partido Komunista ng Pilipinas

I. Nagasingki nga mga kagamo sa atubang sang indi masolbar nga krisis sang pangkalibutanon nga sistemang kapitalista

Ginauyog ang bug-os nga kalibutan sang apat ka nagapanguna nga kontradiksyon: sa tunga sang monopolyong burgesya kag sahing mamumugon, sa tunga sang imperyalismo kag pigos nga pumuluyo sa bug-os nga kalibutan, sa tunga sang mga imperyalistang gahum kag mga pungsod nga nagapanindugan para sa pungsodnon nga independensya, kag sa tunga sang mga nagasumpunganay nga mga imperyalistang pungsod. Sa subong, ang nagasingki nga mga kagamo sa pulitika, pinansya, ekonomiya, baligyaanay, kag militar sa tunga sang pinakadalagko nga imperyalistang pungsod ang prinsipal nga kontradiksyon, ilabi na sa atubang sang wala pugong nga pagpatuman sang imperyalistang US sang iya hegemoniya sa bug-os nga kalibutan. Ini ang prinsipal nga kontradiksyon nga nagahorma sang subong nga sitwasyon sa bug-os nga kalibutan.

Nagalinupok sa lain-lain nga bahin sang kalibutan ang mga armado nga kagamo, mayor tungod sang pagpangsulsol sang imperyalismong US. Hugot ini nga nakaangot sa nagdugay na nga istagnasyon sang ekonomiya sang nagapanguna nga mga kapitalistang pungsod nga indi masolbar-solbar sang monopolyong burgesya. Resulta ini sang nagapadayon nga krisis sang sobra nga produksyon sa halos tanan nga industriya, kag nagadako nga imbensaryo sang indi mabaligya nga mga baligya. Sobra-sobra ang produktibo nga kapasidad, labi sa tanan sang mga nagapanguna nga pungsod nga industriyalisado. Tungod ini sa paglagas sang mga magkaribal nga kumpanya nga daugon ang matag-isa sa produksyon sang pinakadamo nga baligya.

May sobra nga produksyon sa halos tanan nga industriya tungod sa padayon nga pagpauswag sang mga pwersa sa produksyon, partikular na ang mga pag-abanse sa teknolohiya (lakip ang paggamit sang artificial intelligence ukon AI). May sobra-sobra nga kapasidad sa produksyon sang mga kagamitan elektroniko, semikonduktor, mga baterya, elektrik kag de-gasolina nga salakyan, mga *solar panel*, mga salalon, lana kag petrolyo, kemikal, barko, komersyal nga transportasyon, eroplano kag madamo pa nga iban. May sobra-sobra man nga pro-

duksyon sa halos tanan nga produktong pang-agrikultura (bugas, mais, soya, trigo kag iban pa), ilabi na sa mga kapitalistang pungsod.

Ginawasak ukon gina-uyangan ang mga pwersa sa produksyon. Tungod sa sobra nga produksyon, madamo nga mga industriya ang ginapadalagan nga mas manubo sang sa kapasidad sa produksyon. Sa US, halimbawa, 60%–70% lang sang kapasidad sini sa produksyon sang mga salakyan ang nagakagamit, rason nga indi magamit ang binilyon ka dolyar nga mga kagamitan sa produksyon. Sa China, may kapasidad ang mga pabrika diri nga magprod-yus sang tubtob 45 ka milyon ka salakayn elektrik (e-vehicle), apang indi ini lubos nga magamit tungod ang baligyaanay sa pangkalibutanon nga merkado yara sa 16–18 milyon lang. Nagadamo ang mga kumpanya nga nagakaputo ukon ginalamon sa atubang sang grabe nga kapitalistang kumpetisyon.

Madasig subong nga nagadako ang bukal sang AI nga ginakabuangan sang mga dalagko nga monopolyong burgesya. Pila ka trilyon ka dolyar ang igabubo sa patag sang AI sa mga masunod nga tuig, sa wala pa sang tulong nga kadakuon nga pangapital sa imprastruktura kag bono (bond), sobra-sobra sa ginasingahum nga demand kag kitaon sini. Ginapaanggid ini subong sa bukal sang “dotcom” sadtong dekada 1990

nga sang ulihi naglupok kag nagresulta sa isa ka krisis sa pinansya.

Mas nga nagalala ang problema sang madamuan nga pagpangkakas sang mga mamumugon, pagbuhin sa adlaw sang trabaho ukon pagpang-sira sang mga pabrika. Sa US, halos 560,000 ka kumpanya ang nabangkarote sa isa ka tuig halin Septyembre 2024, masobra 10% ang pagdamo kumparar sa tuig, pinakataas halin 2010; lakip ang 32 nga may sobra sa \$1 bilyon ang balor, nga nagsira sa 12 ka bulan halin Septyembre 2024. Sa nagligad nga napulo ka tuig, indi magnubo sa 100,000 ka kapitalistang ulumhan sa US ang nagsira tungod sa padayon nga pagbagsak sang presyo sang ila baligya. Sa Germany, ginasingahum nga magalab-ot sa kabugosan nga 22,000 ang magasira nga kumpanya sa bug-os nga tuig (60 kada adlaw), pinakataas sa isa ka dekada. Sa UK, masobra 2,000 ka kumpanya ang nagsira kada bulan subong nga tuig, samtang yara sa 50,000 ka empresa ang yara sa kritikal nga sitwasyon. Sa China, ginasingahum nga 15 ka kumpanya na lang (halin 129 ka kumpanya) ang mabilin nga magatindog sa industriya sang *e-vehicle* sa masunod nga lima ka tuig.

Padayon nga nagalala ang disempleyo sa bug-os nga kalibutan. Sa sektor sang teknolohiya, ginabana-bana nga magalab-ot sa masobra 200,000 ang mapahalin nga mamumugon tubtob sa katapusan sang tuig (70% sini sa US), lakip ang 24,000 sa Intel, 14,000 sa Amazon, 13,000 sa Verizon kag 9,000 sa Microsoft. Sa industriya sang salakyan sa US, magalab-ot sa 15,000 (20% mas mataas kumparar sa nagligad nga tuig) ang gina-anunsyo nga mapahalin subong nga tuig. Ginabana-bana nga tubtob 60,000 ka mamumugon sa sektor sang salakyan elektrik sa China ang ginakakas

sa trabaho halin 2024. Masobra 48,000 ka empleyado naman sang United Parcel Service ang ginsipa sa trabaho tungod sa pagbagsak sang mga deliberi.

Nalubong sa istagnasyon tubtob mahinay nga pag-uswag ang pangkalibutanon nga ekonomiya. Nagaa-tubang sa nagadako nga peligro sang resesyon ang mga ekonomiya sang tanan nga sentro sang kapitalismo. Ang habyog nga ini sang mahinay nga pag-uswag sang mga ekonomiya magaduha ka dekada na, sugod sang naglupok ang krisis pangpinansya sadtong 2008. Nakabawi ang pangkalibutanon nga ekonomiya sadtong 2022 pagkatakapos nagbulusok sadtong pandemya sang 2020–2021. Subong nga tuig, may mga pagtanta, kalakip ang sa World Bank kag IMF, nga indi mag-uswag ang pangkalibutanon nga ekonomiya lapaw sa 2.3%, mas manubo kumparar sa manubo man nga 2.5% nga pag-uswag sadtong 2024, sa atubang sang lapnagon nga pag-sira sang mga empresa, pagpahalin sang mga mamumugon kag manubo nga demand tungod sa mataas nga tantos sang implasyon, ilabi na sa mga baligya nga pangkosumo.

Nagapabilin nga yara sa bibi sang resesyon ang ekonomiya sang US nga ginabana-bana nga mag-uswag lang sang 1.7%–2% subong nga tuig. Halos katunga (ukon 22) sang mga estado sa US ang yara na sa resesyon. Sa idalum sang patakaran nga “America First” sang gobyernong Trump, ginpatuman ang mga desperado nga tikang nga kuno para buhion liwat ang ekonomiya kag industriya. Lakip diri ang pagpasaka sang taripa sa halos tanan nga gina-import nga baligya sang US nga may deklarado nga katuyuan nga proteksyunan kag suportahan ang lokal nga industriya kag manupaktura. Apang, sa nagligad nga 11 ka bulan, nagpabilin nga nakapundo ukon naghuyang pa ang produksyon industriyal, lakip ang salsalon kag mga salakyan, sa atubang sang sobra nga pangkali-

butanon nga produksyon kag sobra nga imbentaryo.

Ginasigahum naman nga mag-uswag lang sang 1.3% ang ekonomiya sang mga pungsod sa European Union, lakip ang hagmak nga ekonomiya sang Germany nga ginasigahum nga magalab-ot lang sa 0.2% (halin -03% sadtong 2024). Yara sa bibi naman sang resesyon ang United Kingdom halin pa nagligad nga tuig. Nagsarurot sa -2.3% ang Japan sadtong ikatatlo nga kwarto sang tuig, kag wala ginalauman nga mag-uswag nga lapaw sa 1% sa bug-os nga tuig. Padayon naman nga nagahinay ang pagdako sang ekonomiya sang China nga ginasigahum nga magalab-ot lang sa 5% (halin sa masobra 10% nga paglapad sadtong 2000–2010), sa atubang sang pagkapierte sang mga napundo nga proyektong *real estate* (lakip ang sobra-sobra nga mga kondominyum kag bilding pang-opisina), natipon ang binukid nga indi mabayaran nga lokal nga utang kag pagbagsak sang pangapital sa manupaktura kag imprastruktura.

Sa pangkabug-osan ginabana-bana nga may 40–60 ka pungsod ang yara sa bibi subong sang resesyon. Magluwas sa mga napanguna nga sentro sang kapitalismo, lakip man diri ang pila ka abanse nga ekonomiya sa Europe kaangay sang Austria, Germany, Italy, France kag Switzerland nga lunsay negatibo ukon sero ang tantos sang pag-uswag sang ekonomiya, dugang pa sa puluan ka mga pungsod nga atrasado.

Ang grabe nga krisis sang sistemang kapitalista labi nga nagapalala sa pagkawasak sang kapalibutan kag krisis sa klima. Lubos nga nagapamatuk ang mga dalagko nga kapitalistang pungsod nga untaton ang pagpanghugakom sang dunang manggad kag mga hilaw nga materyales, nga kabangdanan sa nagalala nga polusyon industriyal kag pagsa-ka sang temperatura sa bug-os nga kalibutan. Wala sang pulos ang tui-gan nga pakuno-kuno nga “climate

change conference” nga ginapasi-munuan sang UN, lakip ang ginhiwat sini lang sa Brazil.

Sa tunga sang krisis sang pangkalibutanon nga sistemang kapitalista, labi nga nagakalubong ang indi industriyalisado, agraryo kag at-rasado nga ekonomiya sang mga pungsod kolonyal, mala-kolonyal kag mala-pyudal. Ang mga pungsod nga ini ginpiang sang pila ka dekada nga mga patakaran neoliberal nga nagbukas sa mga ini sa pagtambak sang dumuluong nga sobra nga baligya kag pagpangkawkaw sang dumuluong nga kapitalistang pangapital. Tungod sa indi patas nga bayluhanay, nagaantus ang mga ini sang permanente nga depisito sa baligyaanay, krisis sa pinansya kag pag-salig sa utang. Samtang nagasingki ang kumpetisyon sang mga monopolyong burgesya para sa kuluhaan sang pinakabarato nga mga hilaw nga materyales, labi nga naga-inagaway ang mga imperyalistang gahum sining mga pungsod. Nagaantus ang pila ka bilyon nga pumuluyo sa sining mga pungsod sa atubang sang lapnagon nga disempleyo, manubo nga sweldo, pagpang-agaw sang duta kag palangabuhian, kag iban pa nga dagway sang pagpaantus kag pagpamigos.

Padayon nga nagahabyog sa pagpangutang ang mga pungsod sa pagtilaw nga makatibawas ang ila ekonomiya sa krisis, gastuhan sang estado ang mga subsidyo para sa mga nagakapierte nga mga kumpaniya, pondohan ang mga imprastruktura kag nagadako nga gasto sa depensa. Sa sulod lang sang una nga anum ka bulan sang 2025, nagbutyog sa \$21 trilyon ang pangkalibutanon nga utang kag sa halos \$340 trilyon sa tunga-tunga sang tuig. Ginarepresentahan sang pangkabug-osan nga pangkalibutanon nga utang ang halos 290% sang kabug-osan nga pangkalibutan nga produksyon, nga halos kapareho sang pinakataas nga nalab-ot sang 2023. Mayoriya sang pangkalibutanon nga utang ginauyatan sang US,

Japan, China kag pila ka mayor nga pungsod sa Europe. Isa kag tatlo (1/3) sini utang sang US. Ang pang-publiko nga utang ginasigahum nga magadako halin \$102 trilyon sad-tong katapusan sang 2024 padulong sa \$115 trilyon sa katapusan sang tuig. Naglab-ot sa \$31 trilyon ang pangpubliko nga utang sang mga atrasado nga pungsod, doble ang pagdako sa nagligad nga 15 ka tuig. Indi magnubo sa 35 ka pungsod ang yara sa peligro nga indi makabayad sang ila mga utang.

Ginagatungan sang naga-grabe nga pangkalibutanon nga krisis sang kapitalismo ang masingki nga banggi-anay sang mga imperyalista kag mga kagamo sa kalibutan. Ginpatuman ni Trump ang dugang nga mga taripa sa halos tanan nga pungsod para makakuha sang mga konsesyon sa baligyaanay (lakip ang pagpasulod sang mas madamo nga produkto halin sa US, kag pagkontrata sa pagbaligya sang mga surplus nga kagamitan militar). Sa sining ginhimo niya, mas niya nga ginapasingki ang kumpetisyon sa ekonomiya kag baligyaanay sang mga imperyalista kag ginapadalam ang mga sentimyento nga konta-US sa bug-os nga kalibutan.

Nagadako nga nagadako ang peligro sa paglupok sang mga mayor nga armadong kagamo sa lain-lain nga bahin sang kalibutan, kadungan sang nagadako nga pondo nga ginabubo sang mga imperyalista sa militar kag depensa. Nagbutyog ini sang 9.4% sadtong 2024 padulong \$2.72 trilyon, pinakataas nga pagbutyog sa nagligad nga masobra tatlo ka dekada. Padayon ang pagbutyog nga ini subong 2025. Nagalab-ot sa \$1 trilyon ang gasto sa militar sang US subong nga tuig. Sa balayon sang bag-o nga National Security Strategy (2025) sang US (nga nakatutok mayor sa China kag Russia), gindeklarar sini ang katu-yuan nga pauswagon ang "pinakagamhanan, pinakabaskog, kag pinakabanse sa teknolohiya" nga pwersang militar.

Ginatum-okan sang US nga dapat sini lapawan sang mas dako nga pwersa sa kadagatan ang China kag "first island chain" sa palibot sang pungsod. Katuyuan sini kuno ang "likawan ang kumprontasyon," apang labi lang sini nga ginapadako ang posibilidad nga sindihan ang armadong kagamo kag gyera. Sa kaugalingon nga bahin sang kalibutan, ginakasa subong sang US ang plano nga lusubon ang Venezuela (sa South America) sa tabon sang "pakig-away sa drug cartel" para pukanon ang kontra-imperyalista nga gobyerno ni Maduro, kag itukod ang isa ka papet nga gobyerno. Pagkatapos ang nagdugay nga gyera sa Ukraine nga ginsulsolan sang US kag NATO, ginaduso subong sang US ang isa ka kasugtanang para tunga-tunga ang rekurso kag kadutaan sang pungsod. Sa Middle East, tayuyon nga kabulig sang US ang Zionistang estado sang Israel sa gyerang henosidyo batuk sa Palestine nga nagpatay sa indi magnubo sa 67,000 ka Palestino sa duha ka tuig nga pagpangbomba sa Gaza halin Oktobre 2023. Sa pihak sang "untat-lupok" nga ginpatungan sang US sadtong Oktobre, padayon ang mga pag-atake sang mga pwersang Zionista nga nagresulta sa pagpatay sa indi magnubo sa 400 na ka Palestino. Ginakasa sang US ang plano sini nga kontrolon ang pila ka bahin sang Gaza Strip, bisan supak ini sa plano sang Israel nga hugakumon ang bug-os nga kadutaan. Ginbululigan sang US kag Israel nga bombahon ang Iran, nga nagpangapin sang pungsod paagi sa mga kontra-atake.

Padayon ang pagpabaskog sang "komprehensibong estratehikong pagbuligay" sang Russia kag China sa dagway sang ginpabaskog nga baligyaanay (ilabi na sa lana kag enerhiya) kag kooperasyon militar. Padayon nga ginapalapad ang al-yansang BRICS (Brazil, Russia, India, China kag South Africa) nga subong may napulo na ka myembro nga pungsod pagkatapos sang pag-

patapo subong nga tuig sang Indonesia (sunod ang Egypt, Ethiopia, Iran, United Arab Emirates).

Sa duso sini, kag bilang balos sabat sa mga taripa ni Trump, padayon ang pagtinguha sang madamo nga pungsod nga magpalayo sa paggamit sang dolyar sa mga transaksyon pangpinansya, bisan pa nagapabilin ini nga dominante. Lakip diri ang baligyaanay sang lana sang Saudi Arabia kag iban pa nga pungsod sa Middle East (ilabi na sa China), baligyaanay yuan-ruble sang China kag Russia, kag baligyaanay gamit ang lokal nga kwarta sang ASEAN. Halin sa halos wala antes 2022, nagalab-ot na subong sa 20% ang kabug-osang baligyaanay sa kalibutan nga wala nagagamit sang dolyar, rason sang habiyog sang pagnubo sang balor sini, kag nagabaskog nga baligyaanay sang bula-wan. Nagsugod sadtong 2022–2024 ang lapaw sa 1,000 tonelada nga baligyaanay, halin sa kinaandan nga tuigan nga baligyaanay nga 450–500 tonelada sadtong 2010–2021.

Ang nagapadayon nga krisis sa mga kapitalistang mga pungsod nagatuga sang nagasingki nga banggi-anay sang mga sahi. Padayon nga nagasingki ang mga paghimakas mamumugon sa mga sentrong kapitalista, lakip ang welga sang mga mamumugon sang Amazon sa US kag lain-lain nga pungsod. Naglupok man sining tunga-tunga sang tuig ang lapnagon nga mga welga sang mga mamumugon sa China para sa pagpasaka sang sweldo, partikular sa kumpaniyang BYD (nagahimo sang salakyan nga elektrik). Naglupok man ang lapnagon nga mga welga kag hublag protesta sang mga mamumugon sa mga pantalan sa Japan sadtong Marso tubtob Mayo. Sa Europe, naglupok subong nga Disyembre ang mga pangkabug-osang ukon dululungan nga welga sang mga mamumugon kag pumuluyo sa Belgium, The Netherlands, Portugal, Italy kag France, batuk sa patakarang *austerity* ukon pagpahugot sang paha, nga mayor nga iguon ang pen-

syon, sweldo kag mga serbisyo sosyal. Naglupok man ang mga mayor nga welga sa mga nagligad nga bulan sa Germany, Spain, United Kingdom kag iban pa nga pungsod.

Reaksyon sa nagabaskog nga pagpakig-away sang mga mamumugon kag pumuluyo ang talalupangdon nga pagliso sang mga estado sa hayagan nga pasistang mga patakarán. Sa US, mas nagasingki ang awtoritarianismo ni Donald Trump nga direkta nga nagatampalas sa mga layi kag ligal nga proseso sa ginapagtigayon nga mapintas nga *crackdown* batuk sa mga imigrante sa US, nga nagabug-os sang dako nga bulto sang sahing mamumugon. Sa sulsol sang monopolyong burgesya, nagabaskog ang mga partido kag kahublagan pasista kag konserbatibo, kag may mga nagakapilian sa gobyerno. Padayon nga nagalala ang mga atake batuk sa mga Muslim kag Arabo (pinakalala sa US sa nagligad nga tatlo ka dekada, upod ang pagtapna sang gobyernong Trump sa mga protestang maka-Palestine), mga Black kag Latino sa US, mga LGBT, kag mga migrante sa Europe. Kabahin sang nagabaskog nga hab-yog pasista, ginpatuman ang mga layi kag patakaran nga lapnagon nga nagasumpo sa mga kinamatarung sibil, kaangay sang pagpabaskog sang *mass surveillance*, paggamit sang mga *drone*, AI kag iban pa nga teknolohiya nga nagalapas sa mga kinamatarung sa pribasiya. Pagkatapos ang masobra tatlo ka tuig, patarasak pa gihapon ang gyeong henosidyo sang Zionistang Israel sa Gaza. Sa duso mayor sang US, ginapahuyang ang United Nations paagi sa pagdingot diri sang pondo, ilabi na sa mga ahensya sini para sa tawhanon nga kinamatarung.

Ang nagabaskog nga pasisasyon ukon hab-yog pasista sang mga estado sa US kag iban pa nga pungsod nagatulod sa mga pumuluyo nga pabaskugon ang mga paghimakas kontra-pasista sa lain-lain nga bahin sang kalibutan. Ginhiwat ang

mayor nga mga rali kag protestang kontra-pasista, lakip ang 7-milyon ka tawo nga rali sa masobra 2,700 nga pagtililipon sa US batuk sa pagpostura nga hari ni Trump. Sa Europe, ginhiwat ang mga dalagko nga rali konta-pasista sa Netherlands, France, Germany, UK, Norway, kag iban pa nga pungsod. Nagapadayon ang lapnagon nga mga demonstrasyon sang minilyon ka pumuluyo sa lain-lain nga bahin sang kalibutan batuk sa nagapadayon nga henosidyo sang US kag Zionistang estado sa Gaza.

Nagalupok man ang mga paghimakas masa sa mga pungsod nga atrasado, sa atubang sang nagasinaka nga presyo sang mga balaklon, manubo nga sweldo, pagsangyad sang talaksan sang pangabuhì, pagpang-agaw sang duta kag palangabuhian, korapsyon kag garboso nga pangabuhì sang mga opisyal sa gobyerno, pabug-at nga buwis, paggarnatsar sang kwarta sang gobyerno sa mga grandyoso nga proyekto, pagkapalpak sang mga serbisyo sosyal, kag grabe nga indi pag-alalangay; kag mga protesta batuk sa korapsyon sa Kenya, Nepal, Indonesia, Morocco, Madagascar, Peru, Pilipinas kag iban pa nga mga pungsod. Madamo sa mga ini ginatawag nga mga “protestang Gen-Z” tungod sa lapnagon nga ispontanyo nga hublag sang mga pamatan-on nga nagaantus sa tunga sang madalum nga krisis sosyo-ekonomiko. May pila sa ila ang gingamit sang reaksyonaryo ukon repormistang partido, apang madamo man ang sang ulihi nakonsolida bilang mga progresibo kag rebolusyonaryo.

Tuman ka paborable sang kondisyon sa kalibutan para magpabaskog ang mga proletaryong rebolusyonaryo sa lain-lain nga bahin sang kalibutan, kag tukuron ang mga partido komunista, agud mag-serbe nga iwag sa masang mamumugon kag iban pa nga pigos kag ginahimuslan nga sahi. Sa lain-lain nga pungsod, nagapabaskog ang

mga grupo kag partido nga proletaryong rebolusyonaryo sa ideolohiya, sa pagbalik-tuon kag pagpadalum sang hakos sa Marxismo-Leninismo-Maoismo, kag pagdapat sini sa ginaatubang nila nga kongkreto nga kahimtangan. Laragway sang pagpanikasog nga ini ang nahiwat nga lima na ka kumperensya teoritikal sang NDFP halin lang Oktobre 2023, nga gintambungan sang madamo nga partido komunista kag iban pa nga organisasyon rebolusyonaryo agud talakayon ang lain-lain nga mga malahalon nga hambalanan nga ginaatubang sang proletaryo sa bug-os nga kalibutan.

Sa mga pungsod nga nagatinog ang partido komunista, yara sa ubod kag unahan ang proletaryo sa lain-lain nga dagway sang mga demokratikong paghimakas masa, pagtukod sang malapad nga naghiliugyon nga prente para sa pagpangapin sa interes kag kaayuhan sang malapad nga masa batuk sa mga imperyalistang patakaran neoliberal, programa nga paantus, korapsyon kag pasismo sang reaksyonaryong estado. Sa India, Turkey, Peru, Colombia, Pilipinas kag iban pa nga pungsod, padayon nga nagapanikasog ang mga partido komunista sa pagpakig-away sa terroristang todo-gyera nga pagpangsumpo, kag pagpamuno sa rebolusyonaryong armadong paghimakas.

Tuman ka luto ang sitwasyon para sa pagtuhaw kag pag-uswag sang mga partido komunista kag para sa pagpasingki sang mga rebolusyonaryong paghimakas sa bug-os nga kalibutan. Ang kondisyon sang krisis nga gintuga sang kapitalistang sistema matambok nga duta para sa paglapnag sang mga rebolusyonaryong ideya kag lapnagon nga paghulag sang masa. Sentral ang papel sang mga partido komunista sa pagpamuno sang sahing mamumugon kag iban pa nga pigos nga sahi, sa paghimakas para sa kahilwayan, demokrasya kag sosyalismo.

II. Nagalala nga krisis sa ekonomiya, pulitika sa idalum sang rehimen US-Marcos

Labi nga nalubong sa krisis ang nagahari nga sistema mala-kolonyal kag mala-pyudal sa idalum sang paghari sang rehimen US-Marcos. Mas naga-baho ang sistema nga dunot sa kaidadalman, sa atubang sang barahubal nga korapsyon ni Marcos kag kasubong niya nga burukrata-kapitalista nga mga kawatan, sang paghugakom sang higante nga manggad sang ginapaboran nga mga burges kumprador, sang naga-grabe nga pagpangkawkaw sang mga dumuluong kapitalista sa manggad sang pungsod, sang lapnagon nga pagpang-agaw sang duta kag palangabuhian sang masa, kag sang naga-grabe nga pag-antus kag pagpamigos nga ginaantus sang pumuluyong Pilipino. Hugot nga ginapangayo sang sitwasyon ang rebolusyonaryong pagbag-o para sikwayon ang daan nga banas kag dal-on ang pungsod sa banas sang kahilwayan, demokrasya kag kauswagan.

Sa atubang sang nagapadayon nga krisis sang pangkalibutanon nga sistemang kapitalista, ginabutong sa mas madalum nga krisis ang lokal nga ekonomiya sang Pilipinas. Padayon nga ginapunggan sang imperyalismong US kag mga nagahari nga sahi ang pag-uswag sang mga pwersa sa produksyon, kabangdanan nga nagapabilin ini nga agraryo, atrasado kag indi industriyalisado.

Wala pa gihapon sang ikasarang ang lokal nga ekonomiya nga sabton ang kinahanglanon sang pumuluyo kag pauswagon ang pungsod. Ang lokal nga produksyon nagasalig sa pag-import sang produktong pangkonsumo kag pangproduksyon, kag nagasandig sa pag-eksport sang mga hilaw ukon indi masyado naproseso nga mga materyales, kag mga baligya nga gina-asebol halin sa gina-import nga mga pyesas. Ang ekonomiya sang pungsod padayon nga nagasalig sa dumuluong nga kapital kag pagpangutang, bisan pa ginaduso sang World Bank nga pada-kuon ang bahin sang lokal nga pagpangutang.

Tungod sa indi patas nga baligyaanay, nagapabilin nga dako ang permanente nga depisito ukon pagkapierde sa baligyaanay, nga naglabot sa \$54 bilyon sadtong 2024 (halin \$52 bilyon sadtong 2023). Ginasigahum nga magapabilin ini sa amo man nga lebel sa 2025. Nagsarurot sang masobra 83% ang surplus sa *balance of payments* ukon balan-

se sang dumuluong nga transaksyon (baligyaanay, kita kag remitans halin sa luwas sang pungsod, pagsulod sang mga dumuluong nga pautang, ayuda ukon pangapital) sang Pilipinas, halin \$3.7 bilyon sadtong 2023 padulong \$609 milyon sadtong 2024. Sa pihak sang wala pa sang tupong nga kadakuon nga \$38.34 bilyon nga ginpasulod nga remitans sang mga migranteng mamumugon Pilipino.

Nagbutyog ang pagpangutang sang gobyernong Marcos padulong sa ₱17.5 trilyon sadtong Oktobre 2025 (lakip ang ₱5.5 trilyon ukon \$93 bilyon nga dumuluong nga utang), 40% ang pagdako halin sang magpungko si Marcos sadtong 2022, para makatibawas sa depisito sa baligyaanay, pun-an ang *balance of payments*, kag pondohan ang mga dalagko apang indi produktibo nga mga proyektong pang-imprastruktura.

Padayon nga nagahinay ang lokal nga manupaktura tungod sa paggamay sang order ukon paghuyang sang baligyaanay sa pangkalibutanon nga merkado. Lakip diri ang halos 5% nga pagnubo sang eksport sang mga produktong elektroniko kaangay sang mga semikonduktor sa una nga bahin sang tuig, nga nagabug-os sang dako nga bahin sang dumuluong nga pangapital sa Pilipinas kag 55%–60% sang gina-eksport sang pungsod.

Nagapabilin nga manubo ang

produksyon sa agrikultura, bisan pa may gamay nga pagbawi subong nga 2025 kumparar sa 2.2% nga pagkitid sadtong nagligad nga tuig. Mayor nga kabangdanan sini ang pagpabilin nga atrasado sang mga kagamitan, ginagmay nga lebel sang produksyon, kag bulnerabilidad sa mga bagyo kag pagbaha. Mas nga nagalala ang lokal nga produksyon sa agrikultura tungod sa liberalisasyon sa importasyon sang bugas (nga nagalabot sa wala sang tupong nga 4.8 milyon tonelada sadtong 2024) kag iban pa nga mga produkto nga nagresulta sa pagkapierde sang mga mangunguma kag paggamay sang produksyon. Amo man nga sitwasyon ang ginabatas sang sektor sang pangisda, manokan kag babuyan.

Markado ang pagdako sang isip sang mga nawad-an sang trabaho. Halin Abril 2024 tubtob Abril 2025, ginabana-bana nga naglabot sa 500,000 ka trabaho sa manupaktura ang nadula, lakip ang 76,000 nga trabaho sa sektor sang semikonduktor kag elektroniks. Subong nga tuig, nadula ang masobra 300,000 ka trabaho. Ginatos ka libo man nga mga drayber sang dyip, mananagat, nagabaligya sa merkado kag iban pa nga may magagmay nga palangabuhian ang ginaagawan sang ginakitahan sa idalum sang mga programa nga ginapanginpuslan sang mga kapitalistang dumuluong kag lokal.

Sa kaumhan, minilyon ang nagakawad-an sang trabaho sang nagligad nga tinuig tungod sa pagpangagaw sang duta, pagpalayas, pagbag-o sang gamit sang linibo ka ektarya nga duta padulong sa *real estate*, mga minahan, plantasyon, mga proyektong “renewable energy” kag iban pa. Nagakapilitan sila nga mangin mamumugon sa uma, mangita sang lain-lain nga palangitan-an sa agraryo ukon natural nga ekonomiya, ukon magtrabaho sa mga sentrong banwa. Dugang sa paantus sa masang mangunguma ang mga

patakaran sang pasistang pagpang-ipit, ilabi na ang pagtalana sang limitado nga oras sa pagtrabaho sa uma nga ginpatuman sang mga naga-operasyon nga soldado sang AFP.

Pilit nga ginatabunan sang gobyernong Marcos ang grabe nga problema sang kawad-on sang trabaho. Agud ipaguwa nga manubo lang ang tantos sang disempleyo (mas o menos 95%), wala gina-isip sa "pwera sang kusog pangabudlay" ang 10-15 milyon nga kababaehan nga wala sang trabaho (nga mayoriya yara sa kaumhan) kag nagapati-gayon sang wala ginabayaran nga trabaho sa mga puluy-an, magluwas pa sa pila ka milyon nga gin-kategorya nga "dismasyado nga mamumugon" nga wala na nagapangita sang trabaho. Sa pihak nga bahin, gina-isip nga "may trabaho" bisan ang mga "self-employed" kag mga "unpaid family workers" (nga sa pagkamatuod, mga wala sang makita nga trabaho) nga sa kabug-osang nagabug-osang 13-16 milyon ukon tubtob 34% sang ginasing nga trabaho.

Kon iupod ang minilyon nga kababaehan nga ginkakas sa "pwera sang kusog pangabudlay" nga gin-kategorya nga "iloy sang puluy-an" kag kuhaon sa isip sang "may trabaho" ang sa aktwal wala sang palangabuhian, ang matuod nga tantos sang disempleyo sa Pilipinas indi magnubo sa 52% ukon masobra sa katunga sang pwera sang kusog pangabudlay sa pungsod. Indi pa upod diri ang dako nga isip sang "kulang ang trabaho" ukon *underemployed*, nga sa dako nga panahon wala man sang trabaho, nga sa pagkamatuod, kalakip ang mas dako nga yara sa kaumhan.

Sa atubang sang tuman ka grabe nga problema sang disempleyo, naglabot sa 2.47 milyon ka Pilipino ang nagkadto sa luwas sang pungsod agud magtrabaho sadtong 2024, pinakataas sa nagligad nga lima ka dekada, kag ginasingahum nga amo man ka damo ang isip sang madugang sa mga migranteng mamumu-

gon Pilipino. Mas o menos mga 10 milyon ang mga "gig worker" nga katumbas sang 22% sang kabug-osang nga may trabaho. Kaupod na diri ang halos 200,000 nga mga "platform worker." Naupod sa mga ini ang halos 90,000 mga *delivery rider*, nga adlaw-adlaw nagapaunahay sa limitado nga mga order ukon pasahero, kag nagaantus sa grabe nga trapik, samtang ginakaltasan ang gamay nga kita sang mga kapitalista nga nagapanag-iyang mga "app."

Nagasarurot nga nagasarurot ang lebel sang pangabuhing sang mayoriya sang pumuluyo, sa atubang sang tayuyon nga pagsaka sang presyo sang mga balaklon, ilabi na sang lana kag pagkaon. Nagapabilin nga mataas ang presyo sang bugas nga yara sa ₱40-₱50 kada kilo. Nagasaka nga nagasaka ang gasto sa edukasyon, transportasyon, ikayong-lawas, arkila sa balay, tubig, kuryente kag iban pa nga serbisyo, nga dako nga bahin negosyo sang mga dalagko nga kapitalista.

Ginabana-bana nga yara sa ₱1,225 kada adlaw na ang makabuhing nga sweldo para mabuhing nga desente ang lima ka tawo nga pamilya. Mas o menos katunga lang sini ang inadlaw nga minimum nga sweldo nga ₱695 (halin Hulyo) sa National Capital Region, kag tuman ka layo ang mas manubo nga minimum nga sweldo sa lain-lain nga rehiyon. Lubong sa kaimolon ang masang mga mamumugon nga nagakita lang sang minimum nga sweldo. Nagaantus sila sa tuman ka piot nga payag-payag sa mga syudad, kag nagaatubang sa peligro sang pagpalayas sa ila mga puluy-an. Minilyon nga wala sang palangabuhian ang nagapila kag handa nga magbaton sang sensilyo sa mga trabahong kontraktwal ukon pulu-panahon.

Yara sa kaumhan ang masang mangunguma. Sila ang nagabug-osang sang mayoriya sang mga produktibong sahi sang pungsod, apang ang kadamuon nila ginatago sa mga opisyal nga estatistika sang reaksyonaryong gobyerno. Para hatagan ra-

son ang pagpabaya sa kaumhan kag ipaguwa nga indi na agraryo ang ekonomiya, wala na gina-isip sa opisyal nga estatistika sang reaksyonaryong estado ang dako nga bahin sang produktibong populasyon sa kaumhan lakip ang mangunguma nga kababaenhan kag mga bata nga nagapakigbahin sa produksyon.

Mayoriya sa ila wala sang kaugalingon nga duta ukon may gamay nga parselang lang nga ginatalauma, ukon nagatalauma lang bilang mga agrador ukon tenante, ukon nagatrabaho bilang mga mamumugon sa uma. Nagaantus sila sang nagagrabe nga nagagrabe nga mga dagway sang pyudal kag mala-pyudal nga paghimulos kag pagpamigos, partikular na sa dagway sang mataas nga arkila sa duta kag tuman ka nubo nga sweldo. Trabaho karabaw sila sa pagtrabaho kag ginapas-an ang mataas nga gasto sa produksyon, mataas nga interes kag pagkalubong sa utang, pagpangbarat sang ila mga produkto, kag mataas nga presyo sang balaklon. Mas nga nagalala ang ila kahimtangan tungod sa liberalisasyon sa pag-import nga nagresulta sa pagbaha sang imported nga bugas, sibuyas, ahos kag iban pa nga mga produkto pang-agrikultura, kag pagbaha sa ila mga ulumhan tungod sa pagkalbo sa mga kabukiran.

Ginatos ka libo ang ginpalayas sa kaugalingon nga duta tungod sa lapnagon nga pagpang-agaw sang duta sang mga agalon mayduta, burgesya kumprador kag mga bukrurata kapitalista, ginakasangkapan ang mga korte kag lain-lain nga ahensya sang reaksyonaryong gobyerno, kag masami gamit ang pwera sang militar kag pulis, para hatagan ligwa ang pagpalapad sang mga plantasyon, minahan, mga proyektong ekoturismo, *real estate*, "renewable energy" (kaangay sang malagpad nga solar farms) ukon proyekto kuno para sa "climate change mitigation" (kaangay sang mga plantasyon sang kawayan).

Gina-agawan man sang palangabuhian ang mga magagmay nga mangingisda kag mananagat sa pag-

pasilabot sang mga dalagko nga komersyal nga *trawler* ukon barko sa 15-kilometrong *municipal waters*, supak sa gintalana sang reaksyonaryong layi nga eksklusibo nga gamit sang mga magagmay nga mangingisda. Gindingutan man sila sang palangabuhian sa ginahimo nga reklamasyon sang duta, kag kon nagapatigayon ang US kag AFP sang pila ka adlaw ukon semana nga ehersisyo militar sa mga baybayon sang dagat. Nagaatubang man sila sang peligro sa pagtukod sang mga “coastal wind energy projects.” Ginapas-an man nila ang kabug-at sang liberalisasyon sa importasyon sang isda, mataas nga gasto sa pagpangisda kag interes sa pautang.

Ginaantus sang bug-os nga pungsod ang grabe nga epekto sa pagbag-o sang klima. Tungod ini sa pagkawasak sang kabukiran kag suba nga pila ka dekada na nga ginakawkaw sang mga sakon nga dumuluong kapitalista kag kakunsabo nga lokal nga nagahari nga sahi. Indi matakos ang pag-antus sang masang anakbalhas sa kasyudaran kag kaumhan sa atubang sang malala nga pagbaha kag pagkatiphag sang duta, nga nagresulta sa pagkawasak sang mga tanum kag ginakuhaan sang palangabuhian, pagkaguba sang mga balay kag madamuan nga pagkapatay.

Agud mapabilin ang ila medyo masulhay nga pangabuhì, bug-os nga adlaw nga nagakayod man ang mga manunudlo, mga ordinaryo nga empleyado, mga magagmay nga propesyunal, mga tag-iya sang salakyan pangpasahero, gagmay nga tindahan ukon pwesto sa merkado, mga may kahanason nga *freelancer* ukon *gig worker*, mga *call center agent*, kag iban pa nga sektor nga nagabug-os sang sahing petiburges. Sa tunga sang grabe nga krisis sa sosyedad, ang mayoriya sa ila indi na makatago para makapanag-iya sang kaugalingon nga balay ukon makapa-uswag sang kapital, kag madamo ang madasig nga nagsangyad na sa tindog sa pangabuhì sang masang anakbalhas. Minilyon

nga mga pamatan-on ang indi na makatapos sa pag-eskwela sa kolehiyo tungod sa mataas nga sukot kag mga galastuhan.

Langit kag duta ang lang-at sang kabuhì sang masa sang pumuluong Pilipino kag sang pipila nga nagahari nga sahi. Samtang nagasaurot ukon nagabulusok ang kabuhì sang masang Pilipino, nagadako nga nagadako naman ang ginahugakom nga manggad sang mga dalagko nga burgesya kumprador, agalon mayduta kag burukrata kapitalista. Halin sang magpungko si Marcos, ang gin-isa nga pagkabutang sang tatlo ka pinakamanggaranon sa Pilipinas – sanday Enrique Razon, Manuel Villar kag Ramon Ang—nagdako sang 56% halin ₱485.6 bilyon padulong sa ₱1.3 trilyon, samtang ang sa 50 ka pinakamanggaranon nag-uswag sang 25% halin ₱979 bilyon padulong sa ₱4.9 trilyon, tuman ka layo sa ginahatag nga 7.5% nga pagsaka sa sweldo sang mga mamumugon sa National Capital Region subong nga tuig.

Samtang lubong sa lunang sang kaimolon ang masang anakbalhas, nagakabuhì sang grandyoso kag magaribo ang mga nagahari nga sahi. Ginagarnatsar nila ang manggad sa ila mga mansyon, malahalon nga mga salakyan, pribado nga resort kag mga yate, bulawan nga mga relo kag alahas, pagkasino kag byahe pakadto pakari sa iban nga pungsod sakay sa ila kaugalingon nga mga eroplano.

Nagahugakom sila sang higante nga manggad sa pakig-sosyo sa mga dumuluong nga mga dalagko nga kapitalista kag bangko, bilang mga ahente sa pag-eksport sang mga hilaw nga materyales (mga mineral, prutas, kopra, manggad sang dagat, goma), pag-import sang sang mga human nga baligya kag kagamitan, kag bilang mga manedyer sang mga dumuluong nga nagapangapital sa mga kumpaniya nga nagahimulos sa barato nga kusog pangabudlay para sa asembleya para sa pag-eksport. Sila ang yara sa likod sang pagpangagaw sang duta kag pagpribado kag

pagnegosyo sa serbisyo publiko kaangay sang kuryente, tubig, telekomunikasyon kag transportasyon. Ginauyatan nila ang pinakadalagko nga bangko, mga kumpaniya kag konglomereyt lakip ang International Container Terminal Services (ICTS), SM Investments, BDO, SM Prime, Meralco, BPI, San Miguel Corporation, Ayala Land, PLDT, China Bank kag iban pa nga mga dalagko nga korporasyon. Sila ang nagapondo kag nagasuporta sa pinakadalagko nga partido pangpulitika, kag nagabenepisyo sa pabor sang gobyerno sa mga kontrata, layi, proyektong pang-imprastruktura kag mga desisyon sang korte.

Kabulig ang nagahari nga sahi sang imperyalismong US sa pagpabilin sa pagkaatrasado sang pungsod. Wala sila sang interes nga ipundar ang sandigan nga mga industriya kag pauswagon ang agrikultura, ukon itib-ong ang ekonomiya nga nagamakinaugalingon. Nagahugakom sila sang manggad halin sa pagkaatrasado sang pungsod.

Ang nagahari nga sahi nagapanguna nga ginatiglawasan subong sang bat-ulan nga papet nga rehimen Marcos. Ginadumalahan niya ang estado nga neokolonyal, nga ang mayor nga haligi amo ang Armed Forces of the Philippines (AFP) nga ginakontrol sang imperyalismong US. Sa atubang sang nagsingki nga ribalan sa China sa nagligad nga dekada, labi nga ginapahugot sang imperyalismong US ang kontrol sa Pilipinas. Nagasingki ang pagpasilabot militar sang US paagi sa nagadako nga nagadako nga Balikatan exercises, nga ginapatigayon sa idalum sang Mutual Defense Treaty, Visiting Forces Agreement, Enhanced Defense Cooperation Agreement (EDCA) kag iban pa nga indi patas nga mga kasugtanan militar sang US kag Pilipinas.

Sa idalum ni Marcos, nagadako nga nagadako ang presensya sang mga tropa, mga salakyan kag kagamitan pang-gyera sang US sa Pilipinas. Ginbuksan sang US ang dugang nga sekreto nga mga EDCA site

agud magserbe nga kampo sang mga tropa kag tigpanugyan militar sang US, kag bagsakan sang mga misayl kag iban pa nga hinganiban sang US. Kasugpon ini sang nagadako nga presensya militar sang US sa rehiyon Asia kakunsabo ang mga papet nga gobyerno sa Japan kag South Korea. Nagasinampaw ang ehersisyo pang-gyera kag pagmaniobra sang mga pwersang militar sang US. Ginahingalitan sang imperyalismong US ang bangga sang Pilipinas kag China sa South China Sea para mangsulsol sang armadong kagamo. Ginagamit sini ang bat-ulan nga maka-US nga grupong Akbayan bilang sibilyan nga tigsulsol sang gyera, kag tigpaypay sang Sinophobia ukon sentimyentong kontra-China para ilaragway ang US nga "kadampig" ukon "tigpangapin" sang sobereniyang sang Pilipinas.

Ginalaragway sang mga opisyal sang gobyernong US nga yara sa "hyperdrive" ukon tuman ka taas nga lebel ang "kooperasyon" sang US kag Pilipinas, sa atubang sang wala sang tupong nga pagpasilabot militar sini sa pungsod. Gintukod sini lang sang US ang Task Force Philippines para labi nga pahugton ang kontrol sa AFP, kag mas epektibo nga gamiton ini sa mga operasyon militar sang US sa Pilipinas. Sunod sini, ginpalig-on sang Kongreso sang US ang Philippine Enhanced Resilience Act ukon PERA nga magatalana sa Pilipinas sang magalab-ot sa \$500 milyon nga tuigan nga Foreign Military Financing ukon kabug-osang nga \$2.5 bilyon sa 2026–2030, masobra sa napulo ka sulit sang kinaandan nga ginatalana nga ayudang militar sa pungsod.

Lubong sa krisis pangpulitika ang neokolonyal nga estado sa atubang sang masingki nga kagamo sang magkaribal nga hubon sang nagahari nga sahi, kag pagkaligwin sa pumuluyo sang pasista kag bantog sa korapsyon nga rehimen Marcos. Nangin matingkad sa nagligad nga tuig ang pagpasugot ni Marcos sa pagdakop kag pagbilanggo sa anay tiraniko nga presidente

nga si Rodrigo Duterte sa mga kaso nga krimen batuk sa katawhan kanging ngot sa madamuan nga mga pagpamatay sa peke nga "war on drugs." Nangin masingki man ang bangga sang naunsiyami nga *impeachment* kay Sara Duterte nga gintulod sang malapad nga kubay sang mga pwersang progresibo, kabulig ang mga karibal sang mga Duterte sa kongreso. Apang sa kahadlok nga siya ang isunod, ginpa-untat mismo ni Marcos ang pagbista sa Senado, kakunsabo ang mga kaalyado ni Duterte.

Natabo ang isa sa pinakadunot nga reaksyonaryong eleksyon sadtong Mayo, kon diin nangin barahubal ang pagpangdaya, pagbaha sang ginkurakot nga kwarta agud ipangbakal sang boto, kalakasan, kag pangpulitika nga akomodasyon nga gin-areglo sang mga opereytor sang US. Laragway ini sang dunot nga nagahari nga sistema pangpulitika. Sa pihak nga bahin, nangin mapuslanon ang pagpakigbahin sang mga progresibo kag patriyotiko nga partido sa eleksyon, bisan ginpuntirya sila sang pagpang-ipit sang mga armadong pwersa sang estado. Pina-sahi ang ila mga kandidato sa hugot nga pagdala sang mga reklamo sang masa, pagbuyagyag sang dunot nga eleksyon kag pagtib-ong sang pungsodnon kag demokratiko nga handum sang pumuluyo.

Sa tunga sang grabe nga krisis sa ekonomiya kag pagbulusok sang pangabuhian sang malapad nga masa sang pumuluyo, naglupok ang lapnagon nga kaakig sa korapsyon kag pagpangkawkaw sa pondo sang banwa. Nahayag sa mga publikong imbestigasyon ang higante nga pondo sang banwa nga ginkawat sang mga burukrata kapitalista sa maanomaliya kag palpak nga proyektong *flood-control*, kag pagbulsa sang ginatos ka bilyon ka piso nga kikbak sang mga opisyal sang Department of Public Works and Highways (DPWH), mga kongresman, senador, kag matag-as nga opisyal sang Malacañang.

Sugod Septyembre, pila ka bulan

nga nagragasa ang kahublagan protesta kontra-korapsyon, sa pagpanguna sang mga pamatan-on estudyante, ang kinaandan ginatawag nga Generation Z ukon Gen-Z, kaangay sang mga protesta sa iban nga pungsod. Apang indi pareho sang kalit nga pagsagrab sang protesta sa iban nga pungsod, nagtayuyon ang protesta sang mga pamatan-on estudyante sa Pilipinas, sa payong sang pungsodnon-demokratikong mga pwersa. Nakig-isa ini kag nagkuha sang kusog sa hublag sang lain-lain nga demokratikong sektor.

Sa atubang sang mga protesta, ginbuyagyag sang anay kahimbon nga kongresman ni Marcos nga mismo siya nagbaton sang ₱25 bilyon nga "SOP," kag nga siya mismo ang utok sa likod sang pagpasulod sang maanomaliya nga proyekto sa badyet sang iya gobyerno. Agud luwason ang iya kaugalingon, napwersa si Marcos nga isakripisyo ang mga malapit niya nga opisyal nga ginpangalanan nga imbolbado sa pagpangawat, butang nga nagtuga sang mga biak kag nagpasingki sa bangga sa tunga sang magkasumpong nga hubon sa sulod sang Malacañang. Paagi sa pakuno-kuno nga imbestigasyon nga ginmando ni Marcos, pilit nga ginatabunan ang iya direkta nga salabton sa korapsyon sa mga proyektong *flood-control* nga ginpondohan sa iya direkta nga mando sa idalum sang "unprogrammed appropriations."

Sa pag-agos sang kahublagan protesta natukod ang malapad nga mga alyansa kontra-korapsyon sa bug-os nga pungsod. Nagbaskog ang singgit sang mga progresibo kag demokratikong grupo, ilabi na sang mga pamatan-on, para sa pagpapanaug ukon pagpalayas kay Marcos kag Duterte, bisan pa gintilawan sang pseudo-progresibong grupong Akbayan nga torsehon ang kaakig sang pumuluyo kay Marcos. Ginpaabante ang ginaproponer nga pagtukod sang isa ka "national transition council" nga magabulos sa gobyernong Marcos-Duterte, iduso ang pagpaseguro sang mga tikang para

pasabton ang mga imbolbado sa korapsyon, kag ipatuman ang mga pagbag-o sa sistema sang eleksyon kag pang-gobyerno. Bisan yara pa gihapon ini sa balayon sang subong nga sistema, ang amo sini nga panawagan matuod nga nagalaragway sang madalum nga pagkadismaya kag kawad-on sang pagsalig sang pumuluyo sa reaksyonaryong sistema kag sa mga nagahari nga sahi, sa atubang sang pabalik-balik nga kaso sang korapsyon sa nagligad nga mga dekada.

Agud pungan ang pagdako sang mga hublag protesta sa kadalanan, gingamit ni Marcos ang mga pwersa sang pulis kag militar sa pagsumpo sa mga demokratikong kinamatarung. Sadtong Septyembre 21, sa ika-53 nga anibersaryo sang layi militar, masobra 270 ang ginaresto sa Mendiola sang naglupok ang kumprontasyon sa tunga sang mga pulis kag sang mga pamatan-on nga maisog nga nagbato. Sa rali sadtong Nobyembre 30, ginhimo nga daw garison ang Malacañang nga ginpalibutan sang linibo ka pulis agud indi makapalapit sa Malacañang kag indi mabatian ni Marcos ang mga singgit sang pumuluyo.

Ang nangin pagsumpo sa mga rali isa ka bahin lang sang ginpasinki nga pasistang pagpangsumpo sang rehimen Marcos. Ginpaguwa ni Marcos subong nga tuig ang National Action Plan for Unity, Peace and Development (NAP-UPD) nga subong nagaserbe nga plano sa lapnagon nga pagsumpo sa mga demokratikong kinamatarung sa balayon sang *counter-insurgency*. Ginagamit sini ang Anti-Terror Law kag Anti-Financing Terrorism Law agud ipiton ang mga asosasyon masa kag mga organisasyon *civil society*, i-imbolbar ang mga ini sa rebolusyonaryong kahublagan, kag sumpuon ang ila mga aktibidad.

Sa kasyudaran, ginapatigayon sang mga ahente sang estado ang surbeylans, pagpang-ipit kag pagpangkugmat agud pungan ang pagunyon sang mga mamumugon kag pag-organisa sang mga pamatan-on

kag iban pa nga sektor. Ang mga kilala nga lider ukon nagtambong sa mga hublag protesta target sang "pagbisita sa balay" sang mga pulis agud "kumbinsehon" sila nga maghalin sa ila mga organisasyon kag indi na makigbahin sa mga hublag. Wala-tuo ang pagpasaka sang himo-himo nga kaso, lakip ang pamahog nga pagkaso sang pulis sa masobra 90 ka lider pamatan-on kag mga nagtambong sa rali sadtong Septyembre 21 sa Mendiola.

Sa balayon pa gihapon sang NAP-UPD, padayon nga ginapatuman sang AFP, kakunsabo ang NTF-Elcac, ang *de facto* nga layi militar sa ginatos ka mga barangay sa bugos nga pungsod. Ginapatuman ang mga tikang nga mapang-ipit kag mapamigos sa masang mangunguma, lakip ang pagtalana sang limitado nga oras sa pagtrabaho sang mga mangunguma sa iya ulumhan, pagpapirma sa *logbook* sa pagguwa ukon pagsulod sa baryo, pagtalana sang limitado nga kadamuon sang bugas nga pwede baklon, pagpatuman sang kurpyo, kag iban pa nga patakaran sang pagkontrol sa hulag sang taga-baryo. Ginpakat ang mga grupo sang mga soldado sa mga barangay ukon tumpok sang mga baryo sang mga mangunguma, ilabi na ang mga ginasuspetsuhan sang AFP nga nagasuporta sa rebolusyonaryong kahublagan, sa ngalan sang pagpugong sa pagsuporta sa Bagong Hukbong Bayan (BHB).

Ang imperyalimsong US ang nagapanguna nga tigpanugyan kag tighatag sang suporta sa pinansya kag materyal sa operasyon kontra-insurhensya ni Marcos kag sang AFP. Wala-puas ang pagpangsuyod sang AFP sa mga baryo kag mga operasyon batuk sa BHB. Padayon ang mga *triad* ukon tig-tatlo ka operasyon saywar, intelidyens kag kombat, sa desperado nga tikang nga lutoson ang hukbo sang banwa ukon pungan ang mga pwersang gerilya nga maghilikuton masa sa mga baryo. Sa mga lugar nga yara sa idalum sang *focused military operation* sang mga dibisyon kag *area com-*

mand sang AFP, ginapatigayon ang malaparan nga mga operasyon sa magkatambi nga ginapatihan sini nga mga sonang gerilya sang BHB. Binatalyon ang ginagamit sang AFP agud lagson ang mga gerilyang platoon ukon iskwad sang hukbo sang banwa. Kadungan ini sa ginagamit nga padihot nga amnestiya para sa saywar. Halin 2023, gingamit ni Marcos kag iya mga ginsugo ang sekreto nga pakighinun-anon sa NDFP sa pagtilaw nga siuron ini sa hambalanon nga pagsurender sang rebolusyonaryong kahublagan.

Nagapalapta man ini sang mga iskwad ukon grupo sang mga pasistang soldado, kon kaisa nagapakuno-kuno nga mga pwersang gerilya sa pagtilaw nga tiplangon ang masa. Nagagamit man ang AFP sang mga malain nga elemento sa baryo agud magpasulod sang mga kagamitan elektroniko (GPS *tracker*) sa pwesto sang mga yunit gerilya, agud targeton ang mga Pulang hangaway sang pagpangkanyon, istraping kag pagpangbomba halin sa kahawaan gamit ang mga FA-50 *jet fighter* ukon Super Tucano nga pang-atake nga eroplano.

Bisan diin kag bisan san-o man ginapatigayon sang AFP ang mga operasyon kontra-gerilya, kaupod sa target sini ang masang mangunguma sa baryo. Sa kada may armadong engkwentro, pwersa nga ginapahalain ang masa sa ila mga baryo bilang pagsilot sa taga-baryo nga ginapatihan sang mga pasista nga opisyal sang AFP nga nagasuporta sa BHB. Sang nagligad nga tuig, masobra 7,600 ka mga mangunguma ang biktima sang pilit nga pagpabakwit.

Kabahin sila sang kabug-osan nga 240,000 nga nangin biktima sang pasistang pagpangsumpo kag pagpamintas sang rehimen US-Marcos halin Disyembre 2024. Lakip diri ang 40 ka biktima sang pagpamatay, 34 ang ilegal nga pag-abdak, kag masobra 300 ang pagtortyur. Nagapanguna nga target sang pasista nga rehimen US-Marcos ang mga grupo ukon pwersa nga aktibo sa pagpangapin sa kinamatarung

sang masang mangunguma kag mamumugon, kag nagasulong sang pungsodnon kag demokratiko nga handum sang pumuluyo.

Supak sa kasugtanang sang reaksyonaryong gobyerno sa mga pwersang Moro nga nagakilala sa nagakinaugalingon nga gobyerno sa Bangsamoro Autonomous Region of Muslim Mindanao, padayon nga ginahilabtan ni Marcos kag ginapaturan ang iya gahum sa mga hambalanon pangsulod sang Bangsamoro Transition Authority, nga pila ka beses nga naatras ang paghiwat sang eleksyon. Yara sa bibi subong sang pang-alang-alang ang kasugtanang pangkalinong sa atubang sang kapaslawan ni Marcos nga tumanon ang mga obligasyon sang

gobyerno sang Manila sa pihak sang pagsungka sang armas sang pila ka libo nga pwersa sang Bangsamoro Islamic Freedom Fighter sang Moro Islamic Liberation Front. Padayon ang reklamo sang masang Moro sang pagpang-abuso sang mga pasistang pwersa sang AFP batuk sa ila mga kinamatarung.

Kasubong sang pasulit-sulit nga ginapakita sa kasaysayan, wala sang ano man ka singki nga pasistang pagpanumpo ang makapugong sa pagbangon sang pumuluyo. Sa pagkamatuod, samtang nagalala kag nagalapad ang pagpanumpo, mas nga nagasingki ang paghandum sang pumuluyo nga magpangapin kag makig-away.

Sa atubang sang nagadalum

nga krisis sang mala-kolonyal kag mala-pyudal nga sistema sa Pilipinas, kag kaupod sini nga paglala sang pag-antus kag kabudlayan sang pumuluyo, nagatuga ini sang tuman ka paborable nga kahimtangan para sa pagpasulong sang demokratikong rebolusyon sang banwa. Dapat sakmiton sang Partido ang higayon agud labi nga magpalapad kag magpabaskog sa balayon sang pagpanikasog kag pagpadalum sang kahublagan panadlong. Kabulig ang tanan nga rebolusyonaryong pwersa, dapat labi nga magpaka-maayo sa hilikuton masa para pukawon, organisahon kag pahulagon ang minilyon nga pumuluyo sa banas sang rebolusyonaryong paghimakas.

III. Kahimtangan kag mga katungdanan para labi nga pabaskugon ang Partido kag rebolusyonaryong kahublagan

Sa duso kag giya sang kahublagan panadlong sang nagligad nga duha ka tuig, padayon ang tanan nga bahin nga pagpabaskog sang Partido sa ideolohiya, pulitika kag organisasyon. Bug-os ang determinasyon sang mga kadre kag tanan nga lebel sang Partido nga tumuron, sawayon kag pangibabawan ang mga nangin kahuyangan kag kasaypanan sang nagligad kag dal-on sa bag-o nga lebel ang aton rebolusyonaryong praktika.

Tuman ka athag ang ginapakita sang grabe nga krisis sang mala-kolonyal kag mala-pyudal nga sistema sa pungsod kag sang pangkalibutanon nga sistema kapitalista nga nagapabilin nga husto, makatarungan kag hugot nga nagakinahanglan nga isulong ang demokratikong rebolusyon sang banwa sa Pilipinas. Ini lang ang pamaagi para lubos nga mahilway ang pumuluyong Pilipino sa pagpamigos sang imperyalismo, pyudalismo kag burukrata kapitalismo, kag ipundar ang maduagon nga sosyalistang palaabuton.

Halin sa naagihan nga mga pagatras kag kahalitan sang Partido kag rebolusyonaryong kahublagan, naagum naton sang nagligad nga tuig ang nagakaigo nga mga pagsulong sa lain-lain nga patag sang rebolusyonaryong hilikuton, bisan pa may pila ka bahin nga nagakauihi, kag may pila nga nakaangkon sang kahalitan dulot sang indi pa lubos na-

tadlong nga mga kahuyangan kag sa atubang sang wala-puas nga pag-atake sang kaaway.

Kabulig ang tanan nga rebolusyonaryong pwersa, labi nga nagapabaskog ang Partido para pamunuan ang pagsulong sang demokratikong rebolusyon sang banwa paagi sa pangmalawigon nga inaway banwa. Maayo nga nakapwesto subong ang Partido agud pamunuan ang malapad nga masa sang pumuluyo sa tanan nga patag sang paghimakas, mayor sa patag sang armadong paghimakas.

Labi pa naton ginapalig-on ang pundasyon pang-ideolohiya sang Partido halin sang ginsugdan naton sadtong 2023 ang kahublagan pagtuon sa Marxismo-Leninismo-Maoismo kag mga sandigan nga prinsipyo sang Partido. Katuyuan sang kahublagan pagtuon nga isikway, mayor ang empirismo, sekondaryo ang dogmatismo sa ideolohiya;

isikway ang konserbatismo, liberalismo, ikogismo kag sektoralismo, sa pulitika; kag ang burukratismo kag ultra-demokrasya sa organisasyon. Paagi sa pagsaway kag pagsaway sa kaugalingon, kadungan ang pagpanadlong, labi nga ginapabaskog ang paghiliusa sang mga kadre kag komite sang Partido.

Sa pagpanguna sang Komite Sentral, mas ginapadalum ang kahublagan panadlong paagi sa pagsuma sa aton mga inagihan. Nagakuha kita sang mga pagtulun-an sa una kag ikaduha nga dungganon nga kahublagan panadlong, kadungan nga ginabalikan naton ang kasaysayan sang pagtukod kag paglapad sang Partido halin sang itukod ini 57 ka tuig na ang nakaligad.

Padayon nga ginapabaskog kag ginapauswag sang mga kadre kag komite sang Partido ang sosyal nga imbestigasyon kag paganalisa sa sahi (SICA ukon social investigation and class analysis) sa sakop sang ila matag ginapamunuan. Katuyuan sang paghimo kag pagpadalum sang mga SICA ang tumuron ang mga nagapanguna nga problema kag mga isyu nga ginaatubang sang malapad nga masa, ilabi na ang mga dagway

sang pagpamigos kag paghimulos sa mga sandigan nga sahi kag sektor, kag ang nagakadapat nga mga pamalagi ukon taktika para patigayunon ang malaparan nga pagpukaw, pag-organisa kag pagpahulag sa ila. Sa basehan lang sang paghimo sang SICA mahimo ang husto nga plano kag panawagan nga seguridad nga hakson sang masa kag magpapagsik sang ila mga paghimakas.

Bilang sabat sa panawagan sang Partido, tayuyon nga ginapalapad kag ginapapagsik ang mga rebolusyonaryong organisasyon masa sang mga mamumugon, mangunguma, pamatan-on, kababaehan, manunudlo, mga artista, mamumugon pang-ikaayong-lawas, tawong simbahan, syentista, abogado, tuman-dok nga pumuluyo, migrante sa luwas sang pungsod kag iban pa. Paagi sa mga rali kag lain-lain nga dagway sang pagpropaganda, ginapabaskog nila ang panawagan nga isulong kag magpakigbahin sa inaway banwa.

Ginatipon kag ginakonsolida nila ang abanse nga bahin sang masa nga nagapakigbahin sa mga paghimakas masa. Nagaserbe sila nga likom nga taludtod sang malapad nga hayag nga kahublagan masa nga nagagiya agud indi maliso sa repormismo ang masa sa ila mga paghimakas. Sa kasyudaran, nagabaskog ang panawagan para sa pagpalista, ilabi na halin sa kubay sang mga petiburges nga intelektwal, para magkadto sa kaumhan para sa temporaryo ukon pangmalawigon nga deployment. Indi mabalewala ang ila nangin amot sa pagpapagsik sa hilikuton pang-edukasyon, pangkultura kag iban pa nga aspeto sang hilikuton sa hukbo sang banwa.

Santo sa patakaran sang makahas nga pagpalapad nga wala sang ginapasulod bisan isa ka indi masaligan, malig-on naton nga ginapalapad ang kubay sang Partido paagi sa pag-rekrut halin sa bag-ong usbong nga mga rebolusyonaryo sa kahublagan masa, sa kasyudaran kag kaumhan. Nahimo ini tungod ang mga kadre kag katapo sang Partido

yara sa ubod sang mga paghimakas masa kag kaupod sang masa sa ila mga hulag. Nakalapta sila sa bug-os nga pungsod.

Kon diin man may yara indi magnubo sa tatlo ka katapo, ginatukod naton ang sanga sang Partido bilang sandigan sini nga organisasyon. Ang pagpadamo kag pagpabaskog sang mga sanga amo ang talaksan sang kalaparon kag kadalumon sang pag-ugat sang Partido sa masa, kag sang ikarasang sini nga pamunuan ang masa sa rebolusyonaryong banas. Ang mga sanga sang Partido ang yara sa ubod kag bag-as sang mga rebolusyonaryong organisasyon masa kag sang ila mga pungsodnon kag demokratikong mga paghimakas.

Sa kasyudaran, ginatukod naton ang mga sanga sa mga pabrika kag lugar nga ginatrabahuan, sa mga imol nga komunidad, sa mga ekwelaan, opisina, kag iban pa nga lugar. Sa kaumhan, ginatukod naton ang mga sanga sang Partido sa mga baryo ukon tumpok sang mga baryo. Sa mga lugar nga nabungkag sa atubang sang pagpangsumpo sang kaway ukon iban pa nga rason, pursigido subong nga liwat ini nga tukuron.

Partikular sa kaumhan, ang pagtukod sang mga sanga kag komite sang Partido ang yabi agud pamunuan ang malapad nga masa sa ila mga paghimakas para sa reporma sa duta, kag sa armadong paghimakas. Sa pagpamuno sang Partido, ginatukod ang mga Komiteng Rebolusyonaryo sa Baryo, ukon organo sang gahum pangpulitika nga amo ang nagahiliugyon nga prente sa baryo, sa pundasyon sang mga sandigan nga organisasyon masa sang mangunguma, pamatan-on, kababaehan kag mga bata, kag mga mamumugon pangkultura, kaupod ang rebolusyonaryong organisasyon ukon asosasyon sang mga nahanungang nga pwersa sa baryo. Dugang diri, ginatukod sang Partido ang aliansa sa tunga sang taga-baryo, sa masa kag nahanunga nga pwersa sa mga kabanwahanan.

Ginaarmasan sang Partido ang masa. Ginatukod kag ginapahulag naton ang mga yunit sang milisyang bayan bilang pormasyon sang Bagong Hukbong Bayan, kabulig ang mga kwerpo sang pangdependa sa kaugalingon sang mga organisasyon masa, agud isulong ang malapad nga pakig-away gerilya. Kon diin man may natukod, ang mga yunit sang milisyang bayan nagabulig sa pagpabaskog sang mga pultaym nga yunit sang hukbo sang banwa kon diin may nagatindog, kag kon diin wala, nagaboluntaryo nga itukod ang mga bag-ong yunit gerilya sang hukbo sang banwa. Kon diin pwede nga tukuron, palaparon kag pabaskugon ang mga pwersang gerilya sang BHB, ginatukod sang Partido ang mga sona kag larangan gerilya bilang lunsaran sang armadong paghimakas para sa parte-parte nga paglutos sa kaaway.

Sa giya kag inspirasyon sang kahublagan panadlong, padayon nga ginapaslaw sang Partido ang pata-rasak nga teroristang gyera kag saywar sang imperyalismong US kag pasistang rehimen Marcos, sa deklarado nga katuyuan sini nga lutoson ang Partido, ang Bagong Hukbong Bayan kag bug-os nga rebolusyonaryong kahublagan. Indi malutos ang Partido tungod bitbit sini ang tubtob katubtuban nga katampad sa proletaryong ideolohiya, prinsipyo kag kawsa, kag ang ginpanday nga kala-yo sang desisyon nga alagaran ang pumuluyo.

Tayuyon nga ginapaslaw sang BHB ang mga “nakapokus nga operasyon militar” sang AFP paagi sa pagdingot diri sang pokus ukon target. May pila pa nga nahalitan, nga masami dulot sang internal nga mga kahuyangan. Ang tayuyon nga pagpanikasog sang BHB kag lain-lain nga rehiyon dako nga tampa sa pasistang si Marcos nga bug-os ang panghambog nga nagdeklarar sad-tong Hulyo nga “wala na sang grupong gerilya” sa pungsod.

Bitbit ang mga pagtulun-an sang kahublagan panadlong, ginpatigayon ang pagkaayo sa organisasyon kag

kumand sang hukbo sang banwa agud masakop kag makahulag ang mga ini sa mas malapad nga erya, kag mas madasig kag mas likom nga makabalhin-balhin. Sa pangkabugosan, napabilin nga bungol kag bulag ang kaaway, mas nalikawan ang mga awayan depensiba, napreserba ang kusog kag amat-amat liwat nga nakapalapad ang BHB. Nabawi ukon nabalikan sini ang mga base sini sadto, samtang nagapalapad sa mga bag-o nga erya. Sa determinasyon nga makig-away kag aktibo nga pagdepensa, nagakasagang kag nagakalutos sang BHB ang mga atake sang kaaway. Patimaan sang pagbawi, may pila ka yunit nga nakalunsar sang ginagmay nga taktikal nga opensiba. May mga yunit nga mas abanse ang inagihan sa pagtadlong kag liwat nagapabaskog, samtang mas madamo pa ang nagalagas, kag may pila pa nga nagakaulihi.

Yabi sa tanan nga ini ang hugot nga angtanay kag madalum nga pag-ugat sang BHB sa masa, kag pagpasanto sang organisasyon kag mga gerilyang taktika sang paghulag sang hukbo. Agud mahimo ini, ginapapagsik sang mga Pulang hangaway ang pagbulig sa masa sa produksyon, paghatag sang serbisyo pang-ikaayong-lawas kag edukasyon, kag pagpabaskog sang hilikuton pangkultura. Nagabulig ang BHB sa paghimo kag pagpadalum sang SICA, paghugpong sa masa kag pagpasaka sang ila desisyon nga pangapinan kag ipakigbato ang ila kaayuhan.

Padayon man nga ginapakig-awayan sang BHB kag mga rebolusyonaryong pwersa ang wala-puas nga mga operasyon inteledyens, saywar kag pagpasurrender sang kaaway sa tabon sang "lokalisado nga pakighinun-anon pangkalinong". Pursigido nga ginabuyagyag naton nga wala sang pulos ang ginapangako sang AFP kag NTF-Elcac nga "maayo nga kabuhi" nagapanguna sa rason nga wala sini ginasolbar ang sandigan nga problema sa kawad-on sang duta, kag ilabi na tungod lunsay kabulaskugan ang gina-

pahambog nga mga programa sa "reintegrasyon." Ginabuyagyag man ang puno sang korapsyon nga peke nga "pangkauswagan nga proyek-tong" imprastruktura nga ginabubuan sang binilyon ka piso, nga ginabulsa sang mga opisyal militar kag kakunsabo nga mga kontraktor. Labi nga malahalón, ginabuyagyag nga ang matuod nga katuyuan sang ginpangako nga "kalinong" amo ang pagsumpo sa masa agud hilway nga makasulod ang mga dumuluong kapitalista kag kakunsabo nga nagapang-agaw sang duta kag dunang manggad.

Sang nagligad nga tuig, matuod nga may pila ka elemento nga nagtraidor sa Partido kag nagtraidor sa masa. Labi sila subong nga nagakaligwin sa masa kag lubos nga ginakangil-aran. Madamo sa ila ginbasura kag ginpabayaán na sang kaaway pagkatapos nga wala na sang serbe sa saywar. Ang mga pinakasupog nga nangin kriminal nga aset sang kaaway ginkasuhan sa hukmanan sang pumuluyo kag ginpapanaugan sang nagakasanto nga silot nga ginapangayo sang masa, katumbas sang kasal-anan nga nahimo nila.

Ang dako nga mayoriya, ang 99%, sang mga katapo sang Partido kag mga rebolusyonaryong organisasyon masa, nagapabilin nga tampad sa mga prinsipyo kag kawsa sang Partido. May mga bahin nga nagpasibo tungod sa masingki nga pasistang pagpanumpo. Apang mahapos sila nga matipon liwat pagkatapos maathagan sa mga katungdanan nga dapat tungdan.

Paagi sa panindugan para sa makatarungan kag pangmalawigon nga kalinong, padayon man nga ginapaslaw ang mga pagtilaw sang rehimen US-Marcos nga siuron ang National Democratic Front sa tugalong sang pagsungka sang armadong rebolusyon. Sa nagligad nga duha ka tuig, wala sang nangin signipikante nga pagsulong sa mga hinun-anon sang mga tiglawas sang NDF kag sang Gobyerno sang Republika sang Pilipinas (GRP) para

buhion liwat ang pormal nga hinun-anon pangkalinong.

Nagapanguna nga kabangdanan sang pagkaguot sang hinun-anon pangkalinong amo ang pagpilit ni Marcos nga ibasura ang tanan nga nahimo nga kasugtanan sa nagligad nga masobra 30 ka tuig sang negosasyon sa NDFP-GRP, lakip ang The Hague Joint Declaration, ang Joint Agreement on Safety and Immunity Guarantees (JASIG), ang Comprehensive Agreement on Respect for Human Rights and International Humanitarian Law kag iban pa. Ginapakita ni Marcos nga indi niya masarangan nga tindugan ang pirma sang GRP, butang nga nagaguba sang pagsalig sang NDFP kag pumuluyo.

Ginapilit ni Marcos nga "sugdan liwat" ang hinun-anon sa balayon sang "demobilisasyon kag pagdisarma" sa BHB, nga wala anay ginasolbar ang mga sandigan nga problema sang pumuluyo, nga amo ang yara sa ugat sang gyera sibil sa pungsod. Malig-on nga nagapanindugan ang delegasyon sang NDFP kontra sa padihot nga ini. Kon indi pagbag-uhon sang rehimen Marcos ang militarizado nga tindog sini sa hinun-anon, handa ang mga rebolusyonaryong pwersa nga ipaiway ang paghinun-anon sa GRP, tubtob mabuslan si Marcos sang kuntani mas bukas ang panghuna-huma nga resolbahon ang mga sandigan nga problema sang duta kag kawad-on sang hustisya. May yara man ukon wala sang hinun-anon pangkalinong sa GRP, bug-os ang desisyon sang Partido nga isulong ang mga rebolusyonaryong paghimakas agud ipakig-away ang pungsodnon kag demokratiko nga handum sang pumuluyo.

Tuman ka paborable sang obhetibo nga sitwasyon sa sulod sang pungsod kag sa bug-os nga kalibutan agud isulong ang mga rebolusyonaryong paghimakas. Masiling man nga paborable ang suhetibo nga sitwasyon - nga tungod sa kahublagan panadlong, ang Partido kag tanan nga rebolusyonaryong pwersa yara sa mas maayo subong nga tin-

dog, kumparar sa duha ka tuig nga nakaligad, agud sakmiton ang mga higayon para pamunuan ang lapnagon nga pagsulong sang demokratikong rebolusyon sang banwa sa mga maabot nga tuig. Apang, matuod nga dalagko ang ginaatubang naton nga hangkat kag mga mabug-at ang katungdanan nga dapat naton abagahon sa maabot nga isa ukon duha ka tuig agud pabaskugon ang Partido sa ideolohiya, pulitika kag organisasyon, agud mapasaka ang ikasarang sini nga pahulagon ang minilyon ka pumuluyo sa banas sang demokratikong rebolusyon sang banwa paagi sa pangmalawigon nga inaway banwa.

Sa ideolohiya, dapat padayon nga padalumon kag palaparon ang kahublagan panadlong sa pagsulod sini sa ikatatlo nga tuig, nga may walo ka bahin ukon aspeto: isa ka Marxista-Leninista-Maoistang kampanya sang pagtuon, isa ka kampanya para sa madalumon nga pagtuon sa konstitusyon kag programa sang Partido, isa ka kampanya nga pagbalik-tuon sa mga dokumento sang Una kag Ikaduha nga Dungganon nga Kahublagan Panadlong, isa ka kampanya sang pagsuma, isa ka kampanya sang sosyal nga imbestigasyon kag pag-analisa sa sahi (SICA), isa ka kampanya sa pagsaway kag pagsaway sa kaugalingon, isa ka kampanya sa ebalwasyon kag promosyon sang mga kadre, kag isa ka nagapadayon nga kampanya para segurohon ang pagpatuman sang tatlo ka lebel nga kurso sa edukasyon sang Partido.

Kaangay sang nangin pagtum-ok naton sang nagligad, ang kahublagan panadlong, sa mayor, isa ka kahublagan pagtuon, para pasakaon ang teoritikong kinaalam sang mga kadre kag katapo kag pahugton ang hakos sa linyang pang-ideolohiya, mga prinsipyo kag patakaran sang Partido. Ini ang yabi para mapasaka naton ang aton rebolusyonaryong praktika. Dapat paayuhon ang pamaagi kag estilo sang pagtrabaho agud mapadako ang ginalab-ot nga target, mapadalum kag matadlong

ang panghuna-huna kag pamaagi nga nangin upang ukon bara sa mas dako nga pagsulong. Magapadayon ang kahublagan panadlong tubtob desaysibo nga natumod, nasikway kag napangibabawan ang mga nangin kahuyangan kag kasaypanan sang nagligad, kag maagum naton ang pat-od nga direksyon sang paglapad kag pagsulong.

Tuman ka hugot ang kinahanglanon nga ilagas ang pagsuma sa tanan nga lebel kag patag sang hilikuton, ilabi na sa nagligad nga 20-25 ka tuig halin sa katapusan sang ikaduha nga kahublagan panadlong. Ang pagsuma sa panahon nga ini ang magahatag sa aton sang hugot nga madalum nga paghangup sa pangkasaysayan nga balayon sang mga nangin kahuyangan naton sang nagligad nga mga tuig. Katungdanan sang Komite Sentral nga pangunahan ang ining pagsuma, kabulig ang tanan nga komiteng pangrehiyon sa bug-os nga pungsod.

Ginapangayo man sa tanan nga komite sang Partido nga hatagan sang prayoridad ang paghimo sang SICA, nga nakatum-ok sa sistematikong pagtumod sa pinakahinanali nga mga sosyal kag pang-ekonomiya nga hambalanon nga ginaatubang sa sakop kag lebel sang ila pagpamuno. Yabi ang paghimo sang SICA sa pagpapagsik sang mga paghimakas sang masa agud ipakigbato ang ila interes. Base sini dapat himuon ang plano para hugpongon kag pahulagon ang malapad nga masa.

Dapat man ipatigayon ang mga ispesyal nga teoritikong pagtuon sa mga matingkad nga isyu nga ginaatubang sang pumuluyo. Sa atubang sang mga matingkad nga hambalanon sang korapsyon sa idalum sang rehimen Marcos, dapat matutom nga tun-an sang tanan nga katapo sang Partido ang burukratiko kapitalismo, sa giya sang teoritikong artikulo nga ginpaguwa sang Komite Sentral. Ang mga artikulo sa Rebolusyon dapat matutom nga tun-an sang tanan nga katapo sang Partido.

Sa organisasyon, makahas nga palaparon ang Partido nga indi

magpasulod sang bisan isa ka indi masaligan nga elemento. Rekruton bilang mga kandidatong katapo ang pinaka-abanse nga mga elemento halin sa mga aktibistang masa nga indi magnubo sa 18 anyos ang pang-edaron, handa nga batunon ang Marxismo-Leninismo-Maoismo kag ang konstitusyon kag programa sang Partido, kag nagapasugot nga pursigido nga magtungod sang hilikuton sa ano man nga organisasyon sang Partido kag regular nga magbayad sang butaw. Batunon sila bilang mga lubos nga katapo pagkatapos ang panahon sang kandidatura nga gintalana sang konstitusyon.

Dapat padayon nga konsolidahon kag pabaskugon ang Partido santo sa demokratikong sentralismo, ukon demokrasya nga ginagiyahan sang sentral nga pagpamuno, kag sentralismo nga nakabase sa demokrasya. Padayunon ang hugot nga pagpatuman sang mga desisyon sang Komite Sentral kag sang mga nagapamuno nga komite sang Partido para dulungan ang pagmartsa pasulong.

Pabaskugon ang sistemang komite paagi sa pagseguro sang regular kag sistematiso nga pagpulong sang mga komite para mahimo ang kolektibo nga desisyon sa mga ginaatubang nga hambalanon, kag agud kolektibo nga abagahon ang mga plano. Tukuron ang komiteng tigpatuman kag kalihiman sang mga nagapamuno nga komite para sa adlaw-adlaw nga pagpamuno kag pagsubaybay sa mga hilikuton. Segurohon nga hugot nga nasubaybayan sang kolektibo ang mga indibidwal sa pagpatuman sang mga katungdanan.

Padayon nga pabaskugon ang sistema sang regular kag ispesyal nga pag-report sa mataas nga organo kag husto nga pag-ubay sa mga manubo nga komite. Padayon nga pabaskugon ang lain-lain nga sistema ukon pamaagi sang pasahay sang komunikasyon.

Hugot nga ipatuman ang mga patakaran sa seguridad bilang krusyal nga katungdanan sa organisa-

syon. Hugot nga ipatuman ang mga patakaran sa paggamit sang kompyuter, gadyet pang-komunikasyon kag kagamitan elektroniko, sistema sang pag-yabi kag paghalong sa mga *computer files*, pagkoda sa mga listahan, kag "pag-utod sang lastiko" sa mga *fixed point*, ilabi na ang mga mainit kag nagapamuno nga mga kadre. Dapat segurohon sang mga yunit sang BHB ang likom nga gerilyang paghulag, paggamit sang mga sekreto nga rota, pagreki-sa sa mga gamit nga ginapasulod sa yunit, kag pagtudlo sang kahublagan likom sa masa.

Tumuron kag muklat nga hanason ang ikaduha kag ikatatlo nga linya sang mga nagapamuno nga kadre. Dapat sila magpakamaayo sa teorya kag sa komprehensibo nga paghakos sa mga prinsipyo kag patakaran sang Partido. Dapat naton sila hanason bilang mga propesyunal nga rebolusyonaryo nga hakson bilang ila tubtob kamatayon nga karrera ang pagserbe sa Partido kag rebolusyon. Makahas sila nga hatagan sang bag-o nga mga hilikuton kag katungdanan, kag italana sa mga bag-o nga hilikuton sa iban nga patag ukon lugar.

Ipatuman ang patakaran sang "simple nga pangabuhi, matutum nga paghimakas." Hugot nga sundon ang mga natalana nga talaksan sa pag-gasto sang mga komite kag indibidwal. Dapat tinguhaan sang tanan nga komite sang Partido nga magsalig sa kaugalingon. Magpatuhaw sang kinahanglanon nga rekursos para sa kaugalingon nga operasyon, kag himuon ang tanan nga masarangan nga mag-amot sa sentral nga pondo sang Partido.

Sa pulitika, dapat naton pursigido nga pabaskugon ang Bagong Hukbong Bayan kag papagsikon ang rebolusyonaryong armadong paghimakas, isulong ang rebolusyonaryong kahublagan masa sa kasyudaran kag kaumhan, palaparon ang pungsodnon nagahiliugyon nga prente, kag pasanyugon ang hilikuton internasyunal.

Ang Bagong Hukbong Bayan ang

nagapanguna nga organisasyon nga hugot nga ginapamunuan sang Partido. Dapat naton ini pursigido nga pabaskugon agud isulong ang rebolusyonaryong armadong paghimakas bilang nagapanguna nga dagway sang paghimakas sa pagsulong sang pangmalawigon nga inaway banwa.

Yara sa maayo subong nga tindog ang hukbo sang banwa para labi nga magpabaskog. Ini pagkatapos naton kaayuhon ang organisasyon kag operasyon sini nga nakatum-ok mayor sa pagpadalum kag pagpalapad sang baseng masa, agud buligan ang masa sa pagsulong sang ila mga paghimakas kontra-pyudal kag kontra-pasista, kag pagpapagsik sang ila pagsuporta kag pakigbahin sa armadong paghimakas.

Pabaskugon kag palaparon ang hilikuton masa sang mga yunit sang hukbo sang banwa kag buligan ang masa nga papagsikon kag ipasaka ang lebel sang ila pakig-away. Kadungan sini, ipasaka ang ikasarang sang hukbo sang banwa sa paglunsar sang pakig-away gerilya. Pursigido nga ipasaka ang kahanason sang hukbo sang banwa sa paggamit sang taktika sang konsentrasyon, dispersal kag pagbalhin agud permi nga uyatan ang inisyatiba sa militar kag pulitika. Ipabilin nga bulag kag bungol ang kaaway sa presensya kag hulag sang mga yunit gerilya. Pakig-awayan kag paslawon ang mga operasyon kombatan, saywar kag intelidyens sang kaaway.

Dapat ipabilin sang mga yunit sang BHB nga mataas ang pangpulitika nga kamuklatan, disiplina militar kag espiritong makig-away sang mga Pulang hangaway. Hugot nga sundon ang mga pagsulundan sa pagkampo, sa paglakat kag sa paghilikuton masa.

Pahulagon naton ang mga iskward kag platon sang BHB agud ilapta ang armadong paghimakas sa malapad nga kaumhan, kabulig ang mga yunit sang milisyang bayan kag mga kwerpo sang pangdepensa sa kaugalingon. Pwersahon ang kaaway nga unyaton panipis ang iya kusog, agud magtuga sang madamo nga

oportunidad para sa mga taktikal nga opensiba.

Ilunsar ang masarangan nga madaog nga mga taktikal nga opensiba agud silutan ang mga bat-ulan nga mga pasistang kriminal, mga elementong paramilitar, kag mga ginagamit nga mga elementong nagtraidor sa masa, kag kumpiskahon ang ila mga armas. Ilunsar ang kinahanglanon nga armadong aksyon agud pangapinan ang interes kag kaayuhan sang masa batuk sa mga nagapang-agaw sang duta, mga manugkawkaw kag nagaguba sa kapalibutan kag kriminal nga burukrata-kapitalista nga nagapangawat sa pondo sang banwa.

Dapat naton idungan ang pagsulong sang rebolusyonaryong armadong paghimakas sa pagpalapad kag pagpapagsik sang mga paghimakas masa sang mangunguma sa kaumhan. Pursigido nga isulong ang mga paghimakas kontra-pyudal kag kontra-pasista, kag iangot sa mga paghimakas kontra-imperyalista. Dapat pabaskugon ang kahublagan mangunguma para sa reporma sa duta, santo sa minimum kag maksimum nga katuyuan nga gintalana sa Rebolusyonaryong Giya para sa Reporma sa Duta (RGRD) sang Partido.

Dapat isulong sa kaumhan ang lapnagon nga paghimakas agud panubun ang arkila sa duta, dulaon ang usura kag ipasaka ang sweldo sang mga mamumugon sa uma. Dapat lab-uton sang kampanya nga ini ang pinakalapad nga posible nga isip sang mga mangunguma. Pwede nga ipatuman ang maksimum nga programa sang pagpanagtag sang duta kon diin masarangan ini nga pangapinan sang armadong kusog kag kon diin masarangan ini nga dumalahan.

Upod sa programa para sa reporma sa duta, dapat isulong ang mga paghimakas para sa pagpangapin sa duta batuk sa pagpang-agaw sang mga dumuluong nga mga dalagko nga kumpaniya, kakunsabo ang mga agalon mayduta kag mga dalagko nga burgesya kumprador, kag batuk sa pagbag-o-gamit sang mga ulumhan para sa pagpalapad

sang mga minahan, plantasyon, mga proyektong ekoturismo, *real estate*, “renewable energy,” dam, kag iban pa. Ang mga patakaran nga ini nagapaantus sa masang mangunguma kag nagadingot sa ila sang palangabuhian, samtang ginahalitan man ang produksyon pang-agrikultura kag ikasarang sang pungsod nga magtuga sang bastante nga pagkaon para sa pumuluyo.

Kadungan sini, dapat isulong ang malapad nga paghimakas para sa makatarungan nga presyo sang mga humay, sibuyas, ahos, mga utanon kag iban pa nga produkto sa uma, kag pagpamatuk batuk sa liberalisasyon sa importasyon sang mga produktong pang-agrikultura. Dapat tukuron ang malapad nga paghugpong sang masang mangunguma sa lain-lain nga linya sang pananum. Dapat man padayon nga ibuyagyag kag pakig-awayan ang peke nga reporma sa duta kag iban pa nga programa sang estado, nga nagapadasig kag ginahimo nga ligal ang pagpang-agaw sang duta, lakip ang SPLIT program sang World Bank, kag “new emancipation law” ni Marcos.

Sa rebolusyonaryong kahublagan masa sa kasyudaran, hatagan naton sang prayoridad ang labi nga pagpabaskog sang pag-organisa kag pagpahulag sa kubay sang masang mamumugon, sa mala-proletaryado kag mga pamatan-on estudyante. Pabaskugon ang pag-organisa sa kubay sang mga mamumugon industriya sa pinakadalagko nga mga empresa sa pungsodnon nga sentrong syudad kag iban pa nga mga dalagko nga syudad sa lain-lain nga bahin sang pungsod. Upod sini, pabaskugon ang pag-organisa sa mga mamumugon kag mala-proletaryado sa mga imol nga komunidad sa kasyudaran. Labi nga pabaskugon ang pag-organisa sa mga pamatan-on estudyante sa mga mayor nga syudad sa bug-os nga pungsod.

Dapat pabaskugon ang mga paghimakas pang-sektor, pang-ekonomiya kag mga lokal nga paghimakas, kadungan ang mga paghimakas

kontra-imperyalista, kontra-buruk-rata kapitalista kag kontra-pasista, kag pagsuporta sa mga paghimakas mangunguma sa kaumhan. Dapat tinguhaan nga ipabuylo liwat sa pagsulod sang bag-ong tuig ang kahublagan protesta batuk sa korapsyon agud pasabton si Marcos kag Duterte bilang hari kag reyna sang korapsyon, kag ipanawagan ang ila pagpanaug ukon pagpalayas.

Ibuyagyag ang pagsuporta sang imperyalismong US sa korap nga rehimen Marcos. Kadungan sini, ibunag ang malapad nga kampanyang propaganda batuk sa nagadako nga presensya sang mga tropang Amerikano sa Pilipinas, pagtambak sang mga hinganiban pang-gyera, pagtukod sang dugang nga mga base kag pasilidad militar, wala sang katapusan nga mga paghanas sa gyera, kag dala sini nga nagadako nga peligro nga maglupok ang gyera nga magadalag sa pungsod. Ibuyagyag ang papel sang US kag mga bat-ulan nga maka-US nga grupo nga ginagamit sini sa pagpangsulsol sang mga kagamo sa South China Sea.

Padayon nga pabaskugon ang mga likom nga rebolusyonaryong organisasyon masa, pabaskugon ang propaganda kag panawagan para sa demokratikong rebolusyon sang banwa, sa tunga sang pagsulong sang malapad nga hayag nga kahublagan masa. Engganyuhon ang pinakadamo nga mga magsuporta ukon makigbahin sa armadong paghimakas kag mga paghimakas mangunguma sa kaumhan.

Sa pagpamuno sang sahing mamumugon paagi sa Partido, dapat padayon nga pabaskugon ang pungsodnon nagahiliugyon nga prente agud palaparon ang suporta para sa pungsodnon kag demokratikong paghimakas sang pumuluyo. Dapat naton hugpungon ang malapad nga pumuluyo batuk sa imperyalismo, pyudalismo kag burukrata kapitalismo. Dapat ini tukuron sa malig-on nga pundasyon sang sandigan nga rebolusyonaryong alyansa sang sahing mamumugon kag sahing mangunguma, mayor sa kongkreto nga

dagway sang Bagong Hukbong Bayan, isa ka hukbo sang mangunguma nga yara sa idalum sang absoluto nga pagpamuno sang sahing mamumugon, kag iban pa nga dagway sang alyansa ukon paghiusa sang kahublagan mamumugon halin sa kasyudaran sa kahublagan mangunguma sa kaumhan.

Sa basehan sang sandigan nga rebolusyonaryong alyansa mabug-os ang progresibong alyansa sang masang anakbalhas kag sang petiburgesya sa syudad; kag ang mas malapad nga patriyotiko nga alyansa sang mga progresibong pwersa kag sang pungsodnon nga burgesya. Matukod man sang Partido ang mga temporaryo nga alyansa sa mga indi malig-on kag indi masandigan nga mga alyado, masami sa isa ukon pila ka bahin sang nagahari nga sahi batuk sa pinaka-reaksyonaryo, pinaka-pasista kag pinaka-sunod-sunoran sa imperyalismong US.

Yabi sa pagtukod sang pungsodnon nagahiliugyon nga prente ang pag-angkon sang mabaskog nga sandigan nga rebolusyonaryong alyansa. Dapat muklat nga magbantay sa Tuo nga oportunistang tendensyang mabutong ukon mahulog sa repormismo ukon legalismo; ukon sa “Wala” nga oportunistang tendensya nga magsira sang pwertahan sa indi masaligan ukon indi malig-on nga pwersa nga maka-amot sa pagpasulong sang pungsodnon-demokratikong kahublagan, sa direkta ukon indi direkta nga pamaagi.

Sa hinanali sa palaabuton, dapat tinguhaan nga tukuron ang pinakalapad nga nagahiliugyon nga prente batuk kandy Marcos kag Duterte, nga subong lunsay nagatiglawas sa pinaka-reaksyonaryo kag pinaka-pasista nga paksyon sang nagahari nga sahi, agud ubos-kusog nga iligwin, pamatukan kag patalsikon ang nagahari nga rehimen.

Sa basehan sang kusog sang paghulag sang masang anakbalhas kag petiburgesya sa syudad sa pakig-away sa rehimen US-Marcos, dapat engganyuhon ang mga maalyado nga pwersa, ilabi na sa mga

institusyon pangkultura kaangay sang simbahan kag eskwelahan, kag mga yara sa serbisyo sibil, nga aktibo nga ibuyagyag kag batikuson ang korapsyon kag dunot nga sistema. Dapat sila kabigon nga magdampig sa rebolusyonaryong nagahiliugyon nga prente.

Dapat ibuyagyag kag batikuson ang mga ahente sang imperyalismong US kag ikog sang nagahari nga sahi nga grupo kasubong sang Akbayan sa pagpaniplang sa masa kag pagtorse sang ila paghimakas.

Dapat tayuyon nga pabaskugon sang Partido ang rebolusyonaryong hilikuton sa luwas sang pungsod, sa pag-organisa sang mga migranteng mamumugon Pilipino, pagtukod sang internasyunal nga nagahiliugyon nga prente kontra-imperyalista kag pagpabaskog sang pangkalibutanon nga proletaryong solidaridad.

Dapat hugot nga hugpungan ang mga migranteng Pilipino sa mga pungsod kon diin sila nagatrabaho agud pakig-awayan ang lain-lain nga dagway sang pagpamigos kag diskriminasyon sang ila mga dumuluong nga agalon, subong man ang mga paantus nga patakaran kag pagpang-ipit sang reaksyonaryong gobyerno sa Pilipinas. Dapat sila nga pukawon agud iangot ang ila mga pakig-away sa pungsodnon-demokratikong paghimakas sa pungsod, kag engganyuhon sila nga magpauli

kag magpakigbahin sa rebolusyonaryong kahublagan.

Tukuron ang pinakalapad nga lambat sang pakig-abyanay sa tanan nga pumuluyo sa tanan nga bahin sang kalibutan para suportahan sa tanan nga pamaagi ang rebolusyonaryong paghimakas sang pumuluyong Pilipino. Tukuron sa ila kubay ang pinakadamo nga grupo nga nagasuporta kag organisasyon sang pag-abyanay, kag engganyuhon sila nga mag-amot sa pungsodnon kag demokratiko nga mga paghimakas sang pumuluyong Pilipino.

Katungdanan sang Partido nga mag-amot sa tayuyon nga pagpabaskog sang pangkalibutanon nga nagahiliugyon nga prenteng kontra-imperyalista. Dapat iduso sang Partido ang pagtukod ukon pagpabaskog sang internasyunal nga alyansa kontra-imperyalista kag mga kampanya batuk sa imperyalismong US, nga subong amo ang numero uno nga imperyalista nga nagapanulsol kag nagaduso sang mga armadong kagamo sa lain-lain nga bahin sang kalibutan.

Nagakapadat nga padayon nga pabaskugon sang Partido ang solidaridad sa lain-lain nga pwersang proletaryo sa lain-lain nga pungsod, agud itib-ong kag palapnagon ang Marxismo-Leninismo-Maoismo kag gamiton ini sa praktikal nga aplikasyon sa lain-lain nga pungsod. Sam-

tang wala pa sang basehan agud tukuron ang isa ka sentrong internasyunal, ginasuportahan sang Partido ang teoritikal nga talakayan, dayalogo, kag praktikal nga buligay sang mga partido kag pwersang komunista sa katuyuan nga engganyuhon ang pagtukod kag pagpabaskog sang partido komunista bilang bag-as sang mga bag-ong demokratiko ukon sosyalistang rebolusyon sa lain-lain nga pungsod.

Nagapabilin nga pinakadako nga amot sang Partido sa pangkalibutanon nga kahublagan komunista ang pagpasulong sang demokratikong rebolusyon sang banwa sa Pilipinas. Kada tikang pasulong kag kadalagan nga maagum sang Partido sa pagsulong sang rebolusyon Pilipino sumbag sa imperyalismong US, nga amot kag inspirasyon sa tanan nga proletaryong pwersa sa tanan nga bahin sang kalibutan.

Gani, amo na lang ang determinasyon sang Partido Komunista sang Pilipinas, kabulig ang tanan nga rebolusyonaryong pwersa sa Pilipinas, nga ubos-kusog nga isulong ang demokratikong rebolusyon sang banwa. Sa atubang sang tuman ka paborable nga sitwasyon, kag sa husto nga pagpamuno sang Partido, ginalantaw sang Komite Sentral nga magmartsa pasulong ang pangmalawigon nga inaway banwa padulong sa himpit nga kadalagan.

Uyatan kag ikabuhi ang Marxismo-Leninismo-Maoismo!

Tapuson ang imperyalismo, pyudalismo kag burukrata-kapitalismo!

Ipasundayag ang Pulang hayahay sang demokratikong rebolusyon sang banwa!

Isulong ang pangmalawigon nga inaway banwa!

Mabuhay ang proletaryo kag pumuluyong Pilipino!

Mabuhay ang Partido Komunista ng Pilipinas!